

本國學基  
叢書 盧  
昇之集

臺灣省立臺中圖書館



31120003399747

國立公共資訊圖書館典藏  
由國家圖書館數位化

# 唐書文苑傳

盧照鄰字昇之。幽州范陽人也。年十餘歲。就曹憲王義方授蒼雅及經史。博學善屬文。初授鄧王府典籤。王甚愛重之。曾謂羣官曰。此卽寡人相如也。後拜新都尉。因染風疾去官。處太白山中。以服餌爲事。後疾轉篤。徙居陽翟之具茨山。著釋疾文五悲等誦。頗有騷人之風。甚爲文士所重。照鄰旣沈痼。攀廢不堪。其苦嘗與親屬執別。遂自投潁水而死。時年四十。文集二十卷。兄光乘亦知名。長壽中爲隴州刺史。

上海正典圖書公司

盧昇之集目錄

卷一

賦

秋霖賦

馴齋賦

窮魚賦

井序

雙槿樹賦

同崔少監作井序

病梨樹賦

井序

樂府

中和樂九章

歌登封第一

歌明堂第二

歌東軍第三

歌南郊第四

歌中宮第五

歌儲宮第六

歌諸王第七

歌公卿第八

總歌第九

卷二

五言古詩

詠史四首

結客少年場行

贈李榮道士

奉使益州至長安發鍾陽驛

和王爽秋夜有所思

望宅中樹有所思

宿晉安寺

一作亭

於時春也慨然有江湖之思寄贈柳九隴

赤谷安禪師塔

贈益府裴錄事

贈益府羣官

七言古詩

失羣雁并序

行路難

長安古意

明月引

懷仙引

五言律詩

劉生

隴頭水

巫山高

芳樹

雨雪曲

虛昇之集

目錄

五

昭君怨

折楊柳

梅花落

關山月

上之回

紫騮馬

戰城南

十五夜觀燈

入秦川界

文翁講堂

相如琴臺

石鏡寺

辛司法宅觀妓

春晚山莊率題二首

江中望月



元日述懷

益州城西張超亭觀妓

還京贈別

至陳倉曉晴望京邑

晚渡滹沱敬贈魏大

和吳侍御被使燕然

七夕泛舟二首

送梓州高參軍還京

大劍送別劉右史

卷三

五言排律

同臨津紀明府孤雁

西使兼送孟學士南遊

送鄭司倉入蜀

蘇州官池贈別同賦澗字

還赴蜀中貽示京邑遊好

和夏日幽莊

山莊休沐

山林休日田家

宴梓州南亭得池字

山行寄劉李二參軍

首春貽京邑文士

贈許左丞從駕萬年宮

晚渡渭橋寄示京邑遊好

驢臥山中

酬張少府東之

過東山谷口

送幽州陳參軍赴任寄呈鄉曲父老

哭金部章郎中

哭明堂裴主簿

同崔錄事哭鄭員外

至望喜矚目言懷貽劍外知己

早度分水嶺

三月曲水宴得尊字

五言絕句

登玉清

曲池荷

浴浪鳥

臨塔竹

含風蟬

葭川獨泛

送二兄入蜀

宿元武二首

九隴津集

遊昌化山精舍

盧昇之集 目錄

七言絕句

登封大酺歌四首

九月九日登元武山

卷四

騷

五悲并序

悲才難

悲窮道

悲昔遊

悲今日

悲人生

獄中學騷體

卷五

騷

釋疾文并序

粵若

悲夫

命曰

卷六

序

駙馬都尉喬君集序

南陽公集序

樂府雜詩序

宴梓州南亭詩序

宴鳳泉石翁神祠詩序

七日繇州泛舟詩序

楊明府過訪詩序

對問

對蜀父老問

卷七

書

與在朝諸賢書

與洛陽名流朝士乞藥直書

寄表舍人諸公遺衣藥直書

讚

相樂夫人檀龕讚

益州長史胡樹禮爲亡女造畫讚

碑

益州至真觀主黎君碑

盧昇之集卷一

唐 范陽盧照鄰著

賦

秋霖賦

覽萬物兮竊獨悲。此秋霖。風橫天而瑟瑟。雲覆海而沈沈。居人對之憂不解。行客見之思已深。若乃千井埋煙。百廩涵潦。青苔被壁。綠萍生道。於時巷無人跡。林無鳥聲。野陰霾而因自一作晦。山幽曖而不明。長塗未半。茫茫漫漫。莫不埋輪據鞍。銜悽茹歎。借如尼父去魯。圍陳畏匡。將饑不饑。欲濟無梁。問長沮與桀溺。逢漢陰與楚狂。長櫛風而沐雨。永栖栖以遑遑。及夫屈平既放。登高一望。湛湛江水。悠悠千里。泣故國之長楸。見元雲之四起。嗟乎。子卿北海。伏波南川。金河別雁。銅柱辭鷺。關山天骨。霜木一作凋年。眺窮陰兮。斷地。看積水兮。連天。別有東園儒生。西都才客。屋滿鉛槧。家虛儋石。茅棟淋淋。蓬門寂寂。蕪碧草於園徑。聚綠塵於庖甕。玉爲粒兮。桂爲薪。堂有琴兮。室無人。抗高情以出俗。馳精義以入神。論有能鳴之雁。書成已泣之麟。觀皇天之淫溢。孰不隅坐而含顰。已矣哉。若夫繡殺銀鞍。金杯玉盤。坐臥珠璣。左右羅紈。流酒爲海。積肉爲壘。視襄陵而而一本無與昏墊。曾不輟乎此歎。豈知乎堯禹之臞瘠。而孔墨之艱難。

馴鷺賦

孕天然之靈質。稟大塊之奇工。嘴距足以自衛。毛羽足以凌風。懷九圍之遠志。託萬里之長空。陰雲低而含紫。陽景升而帶紅。經過巫峽之下。惆悵彭門之東。既而摧頽短翮。寥落長想。忌蒙莊之見欺。哀武溪之莫往。進謝扶搖之力。退慙歸昌之響。腐食多懼。層巢無像。屈猛性以自馴。抱愁容而就養。於是傍眺德門。言棲仁路。不踐高梁之屋。翔止吾人之樹。聽羣一作雞於月晚。侶羣雀一作鳴於星暮。狎蘭砌之高低。翫荆扉之新故。循廣庭之一息。歷長檐而徑度。若乃風去雨還。河移月落。徘徊亂於雙燕。鳴舞均乎獨鶴。乍嘯聚於霞莊。時追飛於雲閣。荷大德之純粹。將輕姿之陋薄。思一報之無階。欣百齡之有託。

窮魚賦并序

余曾有橫事被拘。爲羣小所使。將致之深議。友人救護得免。竊感趙壹窮鳥之事。遂作窮魚賦。常思報德。故冠之篇首云。

有一巨鱗。東海波臣。洗淨月浦。涵丹錦津。映紅蓮而得性。戲碧浪以全身。宕而失水。屆於陽瀕。漁者觀焉。乃具竿索。集朋黨。鳧趨雀躍。風馳電往。競下任公之釣。爭陳豫且之網。螻蟻見而甘心。猿獭聞而抵掌。於是長舌利嘴。曳綸爭鉤。拖鬚挫鬣。撫背扼喉。動搖不可。騰躍無由。有懷譏潤。甯望洪流。大鵬過而哀之曰。昔予爲鯤也。與是遊乎。自予羽化之子。其孤俄撫翼而下。負之而趨。南浮七澤。東汎五湖。是魚也已相忘於江海。而漁者猶悵望於泥塗。

雙樞樹賦同崔少監作并序



日昨於著作局見諸著作競寫雙槿樹賦蓬萊山上卽對神仙芸香閣前仍觀祕寶金懸秦市揚子見而無言紙貴洛城陸生聞而罷笑故知柔條朽幹吹噓變其死生落葉凋花翦拂成其光價方且傳石渠之故事得槿樹之新名足以脂粉仙臺丹青祕府者也若布衣藜杖巖栖藿食居周室一作當而非一作史吏處漢代而無田學涉蕪淺文多瞽漏一作宜其屏竄用其靜默蓋窮而思達人之情也卑而應高物之理也故疾雷作而蟄蟲飛浮雲興而石碣潤不可廢也雖云聖朝多士而公實居之草澤有人亦國家之美事也故復獎刷芻鄙作雙槿樹賦詞義猥薄退增慙賦曰

方丈蓬萊邈矣悠悠哉芸扁石室圖天揆日若乃羲和掌日太史觀星銅渾玉策寶笥金銘地則圖書之府人則神仙之靈中有芳薜鬱鬱亭亭徒觀其兩砌分植雙階並耀葉鏤五衢榮分四照紛廣庭之靈靡隱重廊之窈窕青陸至而鶯啼朱陽升而花笑紫葍紅蕤玉藥蒼枝露華的皪風色徘徊采粲照灼婀娜隈綏迫而視之鳴環動佩歌扇開遠而望之連珠合璧星漢迴狀仙人之羽蓋疑佚女之瑤臺寂寞攸利栖閒此地委命卷舒隨時榮悴外無嬰天之禍內有逍遙之致朝朝暮暮落復開歲歲年年紅以翠若夫遊蜂戲蝶封其萼輕烟弱霧絡其條去不謂之損來不謂之饒故能出君子之殊俗入詩人之舊謠齊顯味於兩曜效生死於一朝同喪我之非我固雖凋而不凋則一作有亭伯儒門令思詩友翰苑曠其吞夢文鋒高而照斗詠蕪滋之朝夕悲積薪之先後緝繡起於緹紡煙霞生於灌莽豈與巖幽弱篠澗底枯松徒冒霜而停雪空集鳳而吟龍詎得奉仙闈之廣價連筆匠之爲容已矣哉東方生聞而歎曰故年花落不

留人今年花發非故春。條兮夕隕。忽兮朝新。侏儒何功兮短匏。曼倩何負兮長貧。聊寄詞於庭樹。倘有感於平津。

病梨樹賦并序

癸酉之歲。余臥病於長安光德坊之官舍。父老云。是鄆陽公主之邑司。昔公主未嫁而卒。故其邑廢。時有處士孫君思邈居之。君道洽今古。學有數術。高談正一。則古之蒙莊子。深入不二。則今之維摩詰。及其推步甲子。度量乾坤。飛鍊石之奇。洗胃腸之妙。則其甘公。洛下閎。安期先生。扁鵲之儔也。自云。開皇辛丑歲生。今年九十三一作矣。詢之鄉里。咸云。數百歲人矣。共語周齊間事。歷歷如眼見。以此參之。不啻百歲人也。然猶視聽不衰。神形甚茂。可謂聰明博達不死者矣。余年垂強仕。則有幽憂之疾。椿菌之性。何其遼哉。於時。天子避暑甘泉。邈亦徵詣行在。余獨臥病茲邑。闕寂無人。伏枕十旬。閉門三月。庭無衆木。唯有病梨樹一株。圍纒數握。高僅盈丈。花實憔悴。似不任乎歲寒。枝葉零丁。絕一作有意乎朝暮。嗟乎。同託根於膏壤。俱稟氣於太和。而修短不均。榮枯殊質。豈賦命之理。得之自然。將資生之化。有所偏及。樹猶如此。人何以堪。有感於懷。賦之云爾。

天象平運。方祇廣植。挺芳桂於月輪。橫扶桑於日域。建木聳靈邱之上。蟠桃生巨海之側。細葉枝連。洪柯條直。齊天地之一指。任烏兔之棲息。或垂陰萬畝。或結子千年。何偏施之雨露。何獨厚之風煙。愍茲珍木。離離幽獨。飛茂實於河陽。傳芳名於金谷。紫澗稱其殊旨。元光表其仙族。爾生何爲。零丁若斯。無輪奐之

可用無梁棟之可施進無達於斤斧退無競於班倕無庭槐之生意有巖桐之死枝爾其高纒數仞圍僅盈尺修榦罕雙枯條每隻葉病多紫花凋少白夕鳥怨其巢危秋蟬悲其翳窄怯衝颯之搖落忌炎景之臨迫既而地歇蒸霧天收耀靈西秦明月東井流星憔悴孤影徘徊直形狀金莖之的的疑石柱之亭亭若夫西海夸父之林南海蚩尤之樹莫不摩霄拂日藏雲吐霧別有橋邊朽柱天上靈槎年年歲歲無葉無花榮辱兩齊吉凶同軌甯守雌以外喪不修禊而內否亦猶縱酒高賢佯狂君子爲其脗合置其憂喜生非我生物謂之生死非我死谷神不死混彭殤於一觀庶筌蹄於茲理

樂府

中和樂九章

歌登封第一

炎圖喪寶黃麻開璿祖武類帝宗文配天玉鑿垂日翠華淩煙東雲千呂南風入絃山稱萬歲河慶千年金繩永結壁麗長懸

歌明堂第二

穆穆聖皇雍雍明堂左平右城上圓下方調均風雨制度陰陽四窗八達五室九房南通夏火西瞰秋霜天子臨御萬玉鏘鏘

歌東軍第三

遐哉廟略赫矣台臣橫戈礪石倚劍浮津風邱拂蕻日域清塵島夷復祀龍伯來賓休兵寓縣獻馘天闔旆海凱入耀輝震震

歌南郊第四

虔郊上帝肅事圓丘龍駕四牡鸞旗九旂鐘歌晚引紫煬高浮日麗蒼壁雲飛鳴球皇之慶矣萬歲千秋

歌中宮第五

祥遊沙麓慶洽瑤衣黃雲晝聚白氣宵飛居中履正稟和體微儀刑赤縣演教椒闈陶鈞萬國丹青四妃河洲在詠風化攸歸

歌儲宮第六

波澄少海景麗前星高禔誕聖甲觀昇靈承規翠所問寢瑤庭宗儒側席問道橫經山賓皎皎國冑青青黃裳元吉邦家以甯

歌諸王第七

星陳帝子嶽列天孫義光帶礪象著乾坤我有明德利建攸存苴以茅社錫以犧尊藩屏王室翼亮堯門八才兩獻夫何足云

歌公卿第八

蹇蹇三事師師百寮羣龍在職振鷺盈朝豐金輝首佩玉鳴腰青蒲翼翼丹地翹翹歌雲佐漢捧日匡堯

天工人代邈邈昭昭

總歌第九

明明天子兮聖德揚。穆穆皇后兮陰化康。登若木兮坐明堂。池濛汜兮家扶桑。武化偃兮文化昌。禮樂昭兮股肱良。君臣已定兮君永無疆。顏子更生兮徒皇皇。若有人兮天一方。忠爲衣兮信爲裳。餐白玉兮飲瓊芳。心思荃兮路阻長。



盧昇之集卷二

五言古詩

詠史四首

季生昔未達，身辱功不成。髡鉗爲臺隸，灌園變姓名。幸逢滕將軍，兼遇曹邱生。漢祖廣招納，一朝拜公卿。百金孰云重，一諾良匪輕。廷議斬樊噲，羣公寂無聲。處身孤且直，遭時坦而平。丈夫當如此，唯唯何足榮。昔有平陵男，姓朱名阿游。直髮上衝冠，壯氣橫三秋。願得斬馬劍，先斷佞臣頭。天子玉檻折，將軍丹血流。捐生不肯拜，視死真若休。歸來教鄉里，童蒙遠相求。弟子數百人，散在十二州。三公不敢吏，五鹿何能酬。名與日月懸，義與天壤儔。何必疲執戟，區區在封侯。偉哉曠達士，知命固不憂。

大漢昔云季，小人道遂振。玉帛委奄尹，斧鑕嬰搢紳。邈哉郭先生，卷舒得其真。雍容謝朝廷，談笑獎人倫。在晦不絕俗，處亂不爲親。諸侯不得友，天子不得臣。沖情甄負甌，重價折角巾。悠悠天下士，相送洛橋津。誰知仙舟上，寂寂無四鄰。

公業負奇志，交結盡才雄。良田四百頃，所食常不充。一爲侍御史，慷慨說何公。何公何爲敗，吾謀適不同。仲穎恣殘忍，廢興良在躬。死人如亂麻，天子如轉蓬。干戈及黃屋，荆棘生紫宮。鄭生運其謀，將以清國戎。時來命不遂，脫身歸山東。凜凜千載下，穆然懷清風。

結客少年場行

長安重遊俠，洛陽富才雄。玉劍浮雲騎，金鞭明月弓。關雞過渭北，走馬向關東。孫賓遙見待，郭解暗相通。不受千金爵，誰論萬里功。將軍下天上，虜騎入雲中。烽火夜似月，兵氣曉成虹。橫行徇知己，負羽遠從戎。龍旌昏朔霧，烏陣捲胡風。追奔瀚海咽，戰罷陰山空。歸來謝天子，何如馬上翁。

贈李榮道士

錦節銜天使，瓊仙駕羽君。投金翠山曲，奠璧清江濱。圓洞開丹鼎，方壇聚絳雲。寶竇一作，覬幽難識。空歌迴易分。風搖十洲影，日亂九江文。敷誠歸上帝，應詔佐明君。獨有南冠客，耿耿泣離羣。遙看八會所，真氣曉氛氲。一作。

奉使益州至長安發鍾陽驛

躋險一作，險方未夷。乘春聊聘望，落花赴丹谷。奔流下青嶂，一作，葳蕤曉雞。一作，樹滋。混濇春江漲，平川看釣侶。狹逕聞樵唱，蝶戲綠苔前。鶯歌白雲上，耳目多異賞。風煙有奇狀，峻阻埒長城。高標吞巨舫，聯翩事羈勒。辛苦勞疲恙，夕濟幾潺湲。晨登每惆悵，誰念復芻狗。山河獨偏喪。

和王爽秋夜有所思

寂秋一作，寂南軒夜。悠然懷所知，長河落雁苑。明月下鯨池，鳳臺有清曲。此曲何人吹，丹脣間玉齒。妙響入雲涯，窮巷秋風葉。空庭寒露枝，勞歌欲有和。星鬢已將垂。



望宅中樹有所思

我家有庭樹，秋葉正離離。上舞雙棲鳥，中秀合歡枝。勞思復勞望，相見不相知。何當共攀折，歌笑北堂垂。

宿晉安寺

一作亭

聞有絃歌地，穿鑿本多奇。遊人試一覽，臨翫果忘疲。牕橫暮捲落，一作葉簷臥古生枝。舊石開紅蘚，新荷覆綠池。孤猿稍斷絕，一作宿鳥復參差。汎灩月華曉，徘徊星鬢垂。今日刪書客，悽惶君詎知。

於時春也慨然有江湖之思寄贈柳九隴

提琴一萬里，負書三十年。晨攀假蹇樹，暮宿清冷泉。翔禽鳴我側，旅獸過我前。無人且無事，獨酌還獨眠。遙聞彭澤宰，高弄武城絃。形骸寄文墨，意氣託神仙。我有壺中要，題爲物外篇。將以貽好道，道遠莫致旃。相思勞日夜，相望阻風煙。坐惜春華晚，徒令客思懸。水去東南地，氣凝西北天。關山悲蜀道，花鳥憶秦川。天子何時問，公卿本亦不。一作憐自哀還自樂，歸藪復歸田。海屋銀爲棟，雲車電作鞭。倘遇鸞將鶴，誰論貂與蟬。萊洲頻度淺，桃實幾成圓。寄言飛鳧鳥，歲晏同共聯翩。

赤谷安禪師塔

獨坐巖之曲，悠然無俗氛。一作粉酌酒呈丹桂，思詩贈白雲。烟霞朝晚聚，猿鳥歲四。一作時聞水華競。一作秋色山翠含夕曛，高談十二部，細數五千文。如如數冥昧，生生理氤氳。古人有糟粕，輪扁情未分。且當事芝朮，從吾所好云。

贈益府裴錄事

忽忽歲云暮，相望限風烟。長歌欲對酒，危坐遂停絃。停絃變霜露，對酒懷朋故。朝看桂蟾晚，夜聞鴻雁度。鴻度何時還，桂晚不同攀。浮雲映丹壑，明月滿青山。青山雲路深，丹壑月華臨。耿耿離憂積，空令星鬢侵。

贈益府羣官

一鳥自北燕，飛來向西蜀。單棲劍門上，獨舞崑崙一作嶺。山足昂藏多古貌，哀怨有新曲。羣鳳從之遊，問之何所欲。答言寒鄉子，飄飄萬餘里。不飲惡木枝，不飲盜泉水。常思稻粱遇，願棲梧桐樹。智者不我邀，愚夫余不顧。所以成獨立，耿耿歲云暮。日夕苦風霜，思歸赴洛陽。羽翻毛衣短，關山道路長。明月流客思，白雲迷故鄉。誰能借風便，一舉凌蒼蒼。

七言古詩

失羣雁并序

溫縣明府以雁詩垂示，余以爲古之郎官，出宰百里，今之墨綬，入應千官，事止雁行，未宜傷嘆。至如羸臥空巖者，乃可爲失羣慟耳。聊因伏枕多暇，以斯文應之。

三秋北地雪皚皚，萬里南翔渡海來。欲隨石燕沈湘水，試逐銅鳥繞帝臺。帝臺銀闕距金塘，中間鷓鴣已成行。先過上苑傳書信，暫下中州戲稻粱。虞人負繳來相及，齊客虛弓忽見傷。毛翎頻頓一作悴，飛無力。羽翮摧頽君不識，唯有莊周解愛鳴。復道郊歌一作哥，重奇色。惆悵驚思悲未已，徘徊自憐中罔極。傳聞有

鳥集朝陽詎勝仙。鳧邇帝鄉雲間海上應鳴舞。遠得鷗絃猶獨撫。金龜全寫中牟印。玉鶴當變萊蕪釜。願君弄影鳳凰池。時憶籠中摧折羽。

行路難

君不見長安城北渭橋邊。枯木橫槎臥古田。昔日含紅復含紫。當時留霧亦留煙。春景春風花似雪。香車玉轡恆闌咽。若箇遊人不競攀。若箇倡家不來折。倡家寶袂蛟龍帔。公子銀鞍千萬騎。黃鸞一一向花嬌。青鳥雙雙將子戲。千尺長條百尺枝。月一作丹桂一作青星一作榆相蔽虧。珊瑚葉上鶯鶯鳥。鳳凰巢裏雛鷓兒。巢傾枝折鳳歸去。條枯葉落任一作狂風吹。一朝憔悴無人問。萬古摧殘君詎知。人生貴賤無終始。倏忽須臾難久恃。誰家能駐西山日。誰家能堰東流水。漢家陵樹滿秦川。行來行去盡哀憐。自昔公卿二千石。咸擬榮華一萬年。不見朱唇將玉貌。唯聞青棘與黃泉。金貂有時須換酒。一作美酒玉塵恆一作但搖莫計錢。寄言坐客神仙畧。一生一死交情處。蒼龍闕下君不留。白鶴山頭我應去。雲間海上邈難期。赤心會合在何時。但願堯年一百萬。長作巢由也不辭。

長安古意

長安大道連狹斜。青牛白馬七香車。玉輦縱橫過主第。金鞭絡繹向侯家。龍銜寶蓋承朝日。鳳吐流蘇帶晚霞。百丈遊絲爭繞樹。一羣嬌鳥共啼花。遊蜂戲蝶千門側。碧樹銀臺萬種色。複道交牕作合歡。雙闕連鸞垂鳳翼。梁家畫閣天中起。漢帝金莖雲外直。樓前相望不相知。陌上相逢詎相識。借問吹簫向紫烟。曾

經學舞度芳年。得成比目何辭死。願作鴛鴦不羨仙。比目鴛鴦真可羨。雙去雙來君不見。生憎帳額繡孤鸞。好取門簾帖雙燕。雙燕雙飛繞畫梁。羅幃翠被鬱金香。片片行雲著蟬鬢。纖纖初月上鴉黃。鴉黃粉白車中出。含嬌含態情非一。妖童寶馬鐵連錢。倡婦盤龍金屈膝。御史府中烏夜啼。廷尉門前雀欲栖。隱隱朱城臨玉道。遙遙翠幃沒金堤。挾彈飛鷹杜陵北。探丸借客渭橋西。俱邀俠客芙蓉劍。共宿倡家桃李蹊。倡家日暮紫羅裙。清歌一轉口氛氲。北堂夜夜人如月。南陌朝朝騎似雲。南陌北堂連北里。五劇三條控三市。弱柳青槐拂地垂。佳氣紅塵暗天起。漢代金吾千騎來。翡翠屠蘇鸚鵡杯。羅襦寶帶爲君解。燕歌趙舞爲君開。別有豪華稱將相。轉日回天不相讓。意氣由來排灌夫。專權判不容蕭相。專權意氣本英雄。青虬紫燕坐春生。一作風自言歌舞長千載。自謂驕奢凌五公。節物風光不相待。桑田碧海須臾改。昔時金階白玉堂。卽今惟見青松在。寂寂寥寥揚子居。年年歲歲一牀書。獨有南山桂花發。飛來飛去襲人裾。

明月引

洞庭波起兮鴻雁翔。風瑟瑟兮野蒼蒼。浮雲卷露。明月流光。荆南兮趙北。碣石兮瀟湘。澄清規於萬里。照離思於千行。橫桂枝於西第。繞菱花於北堂。高樓思婦。飛蓋君王。文姬絕域。侍子他鄉。見胡鞍之似練。知漢劍之如霜。試登高而騁極。一作目莫不變而迴腸。

懷仙引

若有人兮山之曲。駕青虬兮乘白鹿。往從之遊。願心足。披礪戶。訪巖軒。石瀨潺湲橫石徑。松蘿羃羃掩松

門下空濛而無鳥。上巉巖而有猿。懷飛閣。度飛梁。休余馬於幽谷。掛余冠於夕陽。曲復曲兮煙莊。遂行復行。今天路長。修途杳其未半。飛雨忽以茫茫。山坳札磴。連襄攀石壁而無據。沂泥溪而不前。向無情之白日。竊有恨於皇天。迴行遵故道。通川遍流潦。迴首望羣峯。白雲一作正溶溶。珠爲闕兮玉爲樓。青雲蓋兮紫霜霞。一作裘。天長地久時相憶。千齡萬代一來遊。

五言律詩

劉生

劉生氣不平。抱劍欲專征。報恩爲豪俠。死難在橫行。翠羽裝劍刀。一作稍。黃金鏤飾。一作馬鈴。但令一顧重。不慙百身輕。

隴頭水

隴坂高無極。征人一望鄉。一作望。關河別去水。沙塞斷歸腸。馬繫千年樹。旌懸九月霜。從來共嗚咽。皆是爲勤王。

巫山高

巫山望不極。望望下朝氛。一作莫辨啼猿樹。徒看神女雲。驚濤亂水脈。驟雨暗峯文。露裳衣。一作卽此地。況復遠思君。

芳樹

芳樹本多奇。年華復在斯。結翠成新幄。開紅滿故枝。一作風歸花聲。歷亂日度影參差。容色朝朝落。思君君不知。

雨雪曲

虜騎三秋入。關雲萬里平。雪似胡沙暗。冰如漢月明。高闕銀爲闕。長城玉作城。節旄零落盡。天子不知名。

昭君怨

合殿恩中絕。交河使漸稀。肝腸隨玉輦。形影向金微。一作漢地草應綠。胡庭沙正飛。願逐三秋雁。年年一度歸。

折楊柳

倡樓啓曙扉。楊柳正依依。鶯啼知歲隔。條變識春歸。露葉凝愁黛。風花落亂一作舞衣。攀折將安寄。一作聊軍中音書。信稀。

梅花落

梅嶺花初發。天山雪未開。雪處疑花滿。花邊似雪迴。因風入舞袖。雜粉向妝臺。匈奴幾萬里。春至不知來。

關山月

塞垣通碣石。虜障一作抵祁連。相思在萬里。明月正孤懸。影移金岫北。光斷玉門前。寄書謝中婦。一作言關中。愁時。看鴻雁天。

上之回

回中道路險蕭關烽候多。五營屯右北一作地。萬乘出西河。單于拜玉璽。天子按雕戈。振旅汾川曲。秋風橫大歌。

紫驢馬

紫馬照金鞍。轉戰入皋蘭。塞門風稍急。長城水正寒。雪暗鳴珂重。山長噴玉難。不辭橫絕漠。流血幾時乾。

戰城南

將軍出紫塞。冒頓在烏貪。笳喧雁門北。陣翼龍城南。珣弓夜宛轉。鐵騎曉驂驂。應須駐白日。爲待戰方酣。

十五夜觀燈

錦里開芳宴。蘭缸豔早年。綉彩遙分地。繁光遠綴天。接漢疑星落。依樓似月懸。別有千金笑。來映九枝前。

入秦川界

隴阪長無極。蒼山望不窮。石徑縈疑斷。回流映似空。花開綠野霧。鶯囀紫巖風。春芳勿遽盡。留賞故人同。

文翁講堂

錦里淹中館。岷山稷下亭。空梁無燕雀。古壁有丹青。槐落猶疑市。苔深不辨銘。良哉二千石。江漢表遺靈。

相如琴臺

聞有雍容地。千年無四鄰。園院風煙古。池臺松檟春。雲疑作賦客。月似一作花影。聽琴人寂寂。啼鶯一作鳥處。

空傷遊子神。

石鏡寺

古墓芙蓉塔神銘一作明

松柏烟鷺沈仙鏡底。花沒梵輪前。銖衣千古佛。寶月兩重圓。隱隱香臺夜。鐘聲

徹九天。

辛司法

一作司宅觀妓

南國佳人至。北堂羅薦開。長裙隨風管。促柱送鸞杯。雲光身後落。雪態掌中回。到愁金谷晚。不怪玉山頹。

春晚山莊率題二首

願步三春晚。田園四望通。遊絲橫惹樹。戲蝶亂依叢。竹懶偏宜水。花狂不待風。唯餘詩酒意。當了一生中。田家無四鄰。獨坐一園春。鶯啼非選樹。魚戲不驚綸。山水彈琴盡。風花酌酒頻。年華已可樂。高興復留人。

江中望月

江水向潯陽。澄澄寫月光。鏡圓珠溜徹。弦滿箭波長。沈鉤搖兔影。浮桂動丹芳。延照相思夕。千里共霓裳。

元日述懷

筮仕無中秩。歸耕有外臣。人歌小歲酒。花舞大唐春。草色迷三徑。風光動四鄰。願得長如此。年年物候新。

益州城西張超亭觀妓

落日明歌席。行雲逐舞人。江前飛暮雨。梁上下輕塵。冶服看疑畫。妝樓望似春。高車勿遽返。長袖欲相親。



還京贈別

風月清江夜。山水白雲朝。萬里同爲客。三秋契不凋。戲鳧分斷岸。歸騎別高標。一去仙橋道。還望錦城遙。至陳倉曉晴望京邑。

拂曙驅飛傳。初晴帶曉涼。霧斂長安樹。雲歸仙帝鄉。澗流漂素沫。巖景鶴朱光。今朝好風色。延瞰極天莊。晚渡滹沱敬贈魏大。

津谷朝行遠。冰川夕望曛。霞明深淺浪。風卷去來雲。澄波泛月影。激浪聚沙文。誰忍仙舟上。攜手獨思君。和吳侍御被使燕然。

春歸龍塞北。騎指雁門垂。胡笳折楊柳。漢使採燕支。戍城聊一望。花雪幾參差。關山有新曲。應向笛中吹。七夕泛舟二首。

汀葭肅徂暑。江樹起初涼。水疑通織室。舟似泛仙潢。連橈渡急響。鳴棹下浮光。日晚菱歌唱。風烟滿夕陽。鳳杼秋期至。鳧舟野望開。微吟翠塘側。延想白雲隈。石似支機罷。槎疑犯宿來。天潢殊漫漫。日暮獨悠哉。

送梓州高參軍還京

京洛風塵遠。襄斜煙霧<sup>一作</sup>深。北遊君似智。南飛我異禽。別路琴聲斷。秋山猿鳥吟。一乖青巖酌。空佇白

雲心。

大劍送別劉右史

金碧禹山遠。關梁蜀道難。相逢屬晚歲。相送動征鞍。地咽絳川冷。雲凝劍閣寒。倘遇忠孝所。爲道憶長安。

盧昇之集卷三

五言排律

同臨津紀明府孤雁

三秋遠北地。雁一作萬里向南翔。河洲花稍白。關塞葉初黃。避繳風霜勁。懷書道路長。水流疑箭動。月照似弓傷。橫天無有陣。度海不成行。會刷能鳴羽。還赴上林鄉。

西使兼送孟學士南遊

地道巴陵北。天山弱水東。相看萬餘里。共倚一征篷。零雨悲王粲。清尊別孔融。徘徊聞夜鶴。悵望待秋鴻。骨肉胡秦外。風塵關塞中。唯餘劍鋒在。耿耿氣成虹。

送鄭司倉入蜀

離人丹水北。游客錦城東。別意還無已。一作客恨良無已離憂自不窮。隴雲朝結陣。江月夜臨空。關塞疲征馬。霜氛落早鴻。潘年三十外。蜀道五千中。送君秋水曲。酌酒對清風。

蘇州官池贈別同賦澗字

翰軒遵上國。仙佩下靈雲。一作關尊酒方無地。聯緒喜暫攀。離言欲贈策。高辯正連環。野徑浮雲斷。荒池春草斑。殘花落古樹。度鳥入澄澗。欲敘他鄉別。幽谷有緜蠻。

還赴蜀中貽示京邑遊好

藥宿花初滿。章臺柳向禽。一作飛。如何正此日。還望一作喜。昔多違。恨別風期阻。將乖雲會稀。斂衽辭丹闕。懸  
旗陟翠微。野禽喧戍鼓。春草變征衣。回顧長安道。關山起夕霏。

和夏日幽莊

聞有高蹤客。耿介坐幽莊。林壑人事少。風煙鳥路長。瀑水含秋氣。垂藤引夏涼。苗深全覆隴。荷上半侵塘。  
釣渚青鳧沒。村田白鷺翔。知君振奇藻。遠嗣海隅芳。

山莊休沐

蘭署乘閒日。蓬扉狎遁棲。龍柯疎玉井。鳳葉下金堤。川光搖水箭。山氣上雲梯。亭幽聞唳鶴。窗曉聽鳴雞。  
玉軫臨風奏。瓊漿映月攜。田家自有樂。誰肯謝青谿。

山林休日田家

歸休乘暇日。饁稼返秋場。徑草疏王蕙。巖枝落帝桑。耕田虞訟寢。鑿井漢機忘。戎葵朝委露。齊棗夜含霜。  
南澗泉初冽。東籬菊正芳。還思北窗下。高臥偃羲皇。

宴梓州南亭得池字

二條開勝跡。大隱叶沖規。亭閣分危岫。樓臺遠曲池。長薄秋煙起。飛梁古蔓垂。水鳥翻荷葉。山蟲咬一作交。  
桂枝。遊人惜將晚。公子愛忘疲。願得迴三舍。琴尊長若斯。

山行寄劉李二參軍

萬里烟塵客。三春桃李時。事去紛無限。愁來不自持。狂歌欲嘆鳳。失路反占龜。草礙人行緩。花繁鳥度遲。彼美參卿事。留連求友詩。安知倦遊子。兩鬢漸如絲。

首春貽京邑文士

寂寂罷將迎。門無車馬聲。橫琴答山水。披卷閱公卿。忽聞歲云晏。倚仗出簷楹。寒辭楊柳陌。春滿別一作鳳皇城。梅花扶院吐。蘭葉繞階生。覽鑑改容色。藏書留姓名。時來不假問。生死任交情。

贈許左丞從駕萬年宮

聞道上之回。詔蹕下蓬萊。中樞移北斗。左轄去南臺。黃山聞鳳笛。清蹕侍龍媒。曳日朱旗卷。參雲金障開。朝瞻五城柳。夕宴柏梁杯。漢時光如月。秦祠聽似雷。寂寂芸香閣。離思獨悠悠。

晚渡渭橋寄示京邑遊好

我行背城闕。驅馬獨悠悠。寥落百年事。徘徊萬里憂。途遙日向夕。時晚鬢將秋。滔滔俯東逝。耿耿泣西浮。長虹掩釣浦。落雁下星洲。草變黃山曲。花飛渭水流。進水驚愁鷺。騰沙起狎鷗。一赴清泥道。空思元灞遊。

韜臥山中

臥壑迷時代。行歌任死生。紅顏意氣盡。白璧故交輕。澗戶無人跡。山隄聽鳥聲。春色綠巖上。寒光入溜平。雪盡松帷暗。雲開石路明。夜伴饑鼯宿。朝隨馴雉行。度溪猶憶處。尋洞不知名。紫書常日閱。丹藥幾年成。

扣一作鐘鳴天鼓。燒香厭地精。倘遇一作浮邱鶴。飄飄一作凌太清。

酬張少府柬之

昔余與夫子。相遇漢川陰。珠浦龍猶臥。檀溪馬正沈。價重瑤山曲。詞驚丹鳳林。十年睽賞慰。萬里隔招尋。豪翰風期阻。荆衡雲路深。鵬飛俱望昔。蠖屈共悲今。誰謂青衣道。還歎白頭吟。地接神仙磧。江連雲雨岑。飛泉如散玉。落日似懸金。重以瑤華贈。空懷舞詠心。

過東山谷口

不知名利險。辛苦滯皇洲。始覺飛塵倦。歸來事綠疇。桃源迷處所。桂樹可淹留。跡異人間俗。禽同海上鷗。古苔依井被。新乳傍崖流。野老堪成鶴。山神或化鳩。泉鳴碧澗底。花落紫巖幽。日暮滄龜殼。天寒御鹿裘。不辨秦將漢。甯知春與秋。多謝青溪客。去去赤松遊。

送幽州陳參軍赴任寄呈鄉曲父老一作老

薊北三千里。關西二十年。馮唐猶在漢。樂毅不歸燕。人同黃鶴遠。鄉共白雲連。郭隗池臺處。昭王樽酒前。故人當已老。舊壑幾成田。紅顏如昨日。霜一作髮似秋天。西蜀橋應毀。東周石尙全。瀟池水猶綠。榆關月早圓。寒雲初上雁。庭樹欲銷蟬。送君之舊國。揮涕獨潸然。

哭金部韋郎中

金曹初受拜。玉地始含香。翻同五日尹。遽見一星亡。賀客猶扶路。哀人遂上堂。歌筵長寂寂。哭位自一作日。

蒼蒼歲時賓徑斷。朝暮雀羅張。書留魏主閣。魂掩漢家牀。徒令永平帝。千載罷撞郎。

哭明堂裴主簿

緇歎三十載。通家數百年。潘楊稱代穆。秦晉忝姻連。風雲洛陽道。花月茂陵田。相悲共相樂。交騎復交筵。始謂調金鼎。如何掩玉泉。黃公酒壚處。青眼竹林前。故琴無復雪。新樹但生烟。遽痛蘭襟斷。徒令寶劍懸。客散同秋葉。人亡似夜川。送君一長慟。松臺路幾千。

同崔錄事哭鄭員外

文學秋天遠。郎官星位尊。伊人表時彥。飛譽滿司存。楚席光文雅。瑤山侍討論。鳳詞淩漢閣。龜辯罩周園。已陪東嶽駕。將逝北溟鯤。如何萬化盡。空歎九飛魂。白馬西京驛。青松北海門。夜臺無曉箭。朝奠有虛尊。一代儒風沒。千年隴霧昏。梁山送夫子。湘水弔王孫。僕本多悲淚。沾裳不待猿。聞君絕絃曲。吞恨更無言。至望喜矚目。言懷貽劍外知己。

聖圖夷九折。神化掩三分。緘愁赴蜀道。題拙奉虞薰。隱嶙度深谷。遙嶽一作奇上高雲。碧流遞縈注。青山互糾紛。澗松咽風緒。巖花濯露文。思北常依馭。圖南每喪羣。一本無以。上四句。無由召宣室。何以答吾君。

早度分水嶺

丁十一作年遊蜀道。斑鬢一作萬里。向長安。徒費周王粟。空彈漢吏冠。馬蹄穿欲盡。貂裘敝一作故。轉寒層冰橫。九折積石凌七盤。重谿既下漱。峻峯亦上干。隴頭聞戍鼓。嶺一作外咽飛湍。瑟瑟松風急。蒼蒼山月團。傳

語後來者。斯路誠獨難。

三月曲水宴得尊字

風煙彭澤里。山水仲長園。由來棄銅墨。本自重琴尊。高情逸不嗣。雅道今復存。有美光時彥。養德坐山樊。門開芳杜徑。室距桃花源。公子黃金勒。仙人紫氣軒。長懷去城市。高詠狎蘭蓀。連沙飛白鷺。孤嶼嘯元猿。日影巖前落。雲花江上翻。興闌車馬散。林塘夕鳥喧。

五言絕句

登玉清

絕頂橫臨日。孤峯半倚天。徘徊拜真老。萬里見風煙。

曲池荷

浮香繞曲岸。圓影覆華池。常恐秋風早。飄零君不知。

浴浪鳥

獨舞依盤石。羣飛動輕浪。奮迅碧沙前。長懷白雲上。

臨塔竹

封霜連錦砌。防露拂瑤塔。聊將儀鳳質。暫與俗人諧。

含風蟬



高情臨爽月急響送秋風獨有危冠意還將衰鬢同

葭川獨泛

倚棹春江上橫舟石岸前山暝行人斷迢迢獨泛仙

送二兄入蜀

關山客子路花柳帝王城此中一分手相顧憐無聲

宿元武二首

方池開曉色圓月下秋陰已乘千里興還撫一絃琴  
庭搖北風柳院繞南溟禽累宿思方重窮秋嘆不深

九隴津集

落落樹陰紫澄澄水華碧復有翻飛禽徘徊疑曳鳥

遊昌化山精舍

寶地乘峯出香臺接漢高稍覺真途近方知人事勞

七言絕句

登封大酺歌四首

明君封禪日重光天子垂衣麻數長九洲四海常無事萬歲千秋樂未央

日觀仙雲隨鳳輦。天門瑞雪照龍衣。繁絃綺席方終夜。妙舞清歌歎未歸。  
翠鳳逶迤登介邱。仙鶴徘徊天上遊。借問乾封何所樂。人皆壽命得千秋。  
千年聖主應昌期。萬國淳風王化基。請比上古無爲代。何如今日太平時。

九月九日登元武山

九月九日眺山川。歸心歸望積風煙。他鄉共酌金花酒。萬里同悲鴻雁天。

# 盧昇之集卷四

騷

## 五悲并序

自古爲文者。多以九七爲題目。乃有九歌。九辯。九章。七發。七啓。其流不一。余以爲天有五星。地有五嶽。人有五章。一作常。禮有五禮。樂有五聲。五者。亦在天地之數。今造五悲。以伸萬物之情。傳之好事耳。

## 悲才難

一悲曰。恭聞古之君子兮。將遠適乎百蠻。何故違父母之宗國。從禽獸於末班。將矯詞兮不往。將背俗兮不還。甯曲成而薄喪。不直敗以厚顏。彼聖人兮。猶若此。況不肖與中間。古往今來。邈矣悠哉。嵇生玉折。顏子蘭摧。人兮代兮。俱盡。代兮人兮。共哀。至如左邱失明。冉耕有疾。兵法作而斷足。史記脩而下室。高明者鬼瞰其門。正直者人怨其筆。雖爲鏡於前代。終抱痛於今日。別有漢陽計一作許。據邠國臺卿。抗希代之奇節。負超時之令名。坎壈九死。離披再生。伊才智之爲患。故賢哲之所嬰。若乃賈長沙之數奇。崔亭伯之不偶。思欲削魯史之高位。鉗楊墨之辯口。爲書爲禮。驅季俗於三古之前。垂譽垂聲。正頹綱於百王之後。天子聞之而欲用。羣公畏之而莫取。徒窟蠶於泥沙。竟龍鍾於塵垢。昇乎稽之古人。則如彼。考之今代。又如此。近有魏郡王君一作公。曰方華。陰楊氏曰亨。威能博達。奇偉覃思。研精徽孔。門之禮樂。吞鬼谷之縱橫。岳

秀泉澄如川如陵。高談則龍騰豹變。下筆則煙飛霧凝。王則官終於郡吏。楊則官止於邑丞。何異夫操太阿以烹小鮮。飛夜光而彈伏翼。灼金龜兮訪兆。邀玉騏兮聘力。雖勞形而竭思。吾固知其不得。余之昆兮曰。杲之余之季兮曰。昂之杲也。杲杲兮如三足之鳥。昂也。昂昂焉如千里之駒。杲之爲人也。風流儒雅。爲一代之和玉。昂之爲人也。文章卓犖。爲四海之隋珠。竝蘭馨兮桂馥。俱龍駒兮鳳雛。生於戰國。則管樂之器。長於闕里。則游夏之徒。以方圓異用。遭遇殊時。故才高而位下。咸默默以遲遲。青青子衿兮。時向晚黃。黃我綬兮。鬢如絲。昆兮何責。坐乾封兮老矣。季兮何負。橫武陵而棄之。舉天下兮稱屈。何暗室之足欺。爲小人之所笑。爲通賢之所悲。童子尙知其不可。矧衡鏡與蓍龜。故曰。至道之精。官官冥冥。至道之極。昏昏默默。焚符破籙。而人朴鄙。剖斗折衡。而人不爭。捩工倕之指。而天下始巧。膠離婁之目。而天下始明。然後除其矯黠之患。安其性命之精。太平之代。萬物肫肫。凡聖脗合。賢愚泯昏。公卿不接友。長吏不迎尊。當成康勿用。何暇談其兵甲。典謨旣作。焉得耀其書論。雖有晏嬰子產。將頓伏於閭巷。雖有冉求季路。且耕牧於田園。彼尋常之才。子又焉可以勝言。命鸞鳳兮逐雀。驅龍驥兮捕鼠。使掌事者校其功兮。孰能與隼狸而齊舉。金爲舟兮。璫瑁櫂。不可以涉邱陵些。珠爲衣兮。翡翠裳。不可以混樵蒸些。何器用之乖刺。悼斯人之勤多一作些。倚長巖以爲枕兮。吸流光以高臥。見城市以盈虛。若蚊蠱之相過。當其時也。巢由滿野。不知稷卨之尊。周召益朝。莫救夷齊之餓。若夫管仲不遇齊桓。則城陽之贅壻。太公不遭姬伯。亦棘津之漁夫。一仁一義。柴也來兮。由也醢。一忠一孝。微子去之。箕子奴。聖人百慮而一致。君子同歸而殊塗。推旣焚兮。

胥既溺桀亦放兮文亦拘。笙簧六籍則秦谷有坑。儒之痛。黼藻百行則漢家有黨。錮之誅。鄴都傾覆。飛禍纏於高鼻。洛陽板蕩。橫死坐其無鬚。嗚呼。喋嘶口含天憲。睚眦蓋芥。屍僵路隅。變化與屈伸交逐。窮達與存亡並驅。因其所有而有之。則萬物無不有。就其所無而無之。則萬物無不無。有竅而生。甯唯混沌無用而飽。何獨侏儒。是以蘧伯玉卷兮長卷。甯武子愚兮更愚。庭有樹兮樹有荊。園有鳥兮鳥有鶻。鶻其鳴矣。思諸兄矣。荆其頽矣。思諸季矣。巖有芳桂。隰有棠棣。枝龍崑兮相樛。葉翻翻兮相翳。天之生我。胡甯不惠。何始吉兮初征。悲終凶於未濟。

悲窮道

二悲曰。流淚公子。傷心久之。歷萬古以抽恨。橫八荒而選悲。有幽巖之臥客。兀中林而坐思。形枯槁以崎嶇。足聯蹠以緇。蠶悄悄兮忽愴。眇眇兮惆悵。迢遙兮獨蹇。淹留兮空谷。天片片而雲愁。山幽幽而谷哭。露垂泣於幽草。風含悲於拱木。徒觀其頂集飛塵。尻埋積雪。骸骨半死。血氣中絕。四支萎隨。五官鼓缺。皮襞積而千皺。衣聯褰而百結。毛落鬢一作禿。無叔子之明眉。脣亡齒寒。有張儀之羞舌。仰而視。睛翳其若瞽。俯而動。身羸而欲折。神若存而若亡。心不生而不滅。其所居也不羣。其所狎也非人。古樹爲伴。朝霞作鄰。下陰森以多晦。傍恍惚兮無垠。松門草合。石路苔新。公子方撫其背而曳其裾。曰。子非有唐之文士歟。燕地之高門歟。昔也子之少。則玉樹金枝。及其長。則龍章鳳姿。立身則淹中不足言其禮。揮翰則江左莫敢論其詩。每兢兢於暗室。恆翻翻於明時。常謂五府交辟。三臺共推。朝紆會稽之綬。夕獻長楊之詞。痛私門

之禍速。惜公車之詔遲。豈期晦明乖序。寒燠愆度。鱗傷羽折。筋擊肉盡。雖定於丹澗之隅。穀棘於藪山之  
路已焉哉。已焉哉。崑山玉石忽摧頽。事去矣。事去矣。古今聖賢悲何已。天道如何。自古相嗟。項羽帳中之  
飲。荆卿易水之歌。何壯夫之儒抑。伊兒女之情多。借如蘇武生還。溫序死節。王陵之母伏劍。杞梁之妻泣  
血。事蓋迫於功名。情有兼於貞烈。若關羽漢陰。田橫海島。孤城已迫。疲兵向尙。老離離碣石之鴻。羃羃  
江潭之草。迴首永訣。吞聲何道。及夫獻帝偷生。懷王客死。哀西都之城闕。憶南荆之朝市。鳳凰樓上隴山  
雲。鸚鵡洲前吳江水。一離一別兮。漢家宮掖似神仙。獨坐獨愁兮。楚國英華。華競桃李。別有士安多疾。  
顏奇不起。馬援困於壺頭。再耕悲於牖裏。平生書劍。宿昔琴樽。研精殫於玉冊。博思浹於銅渾。思欲爲龜  
爲鏡。立德立言。成天下之聲。歷定古今之諄諄。一朝溘臥。萬事甯論。君徒見邱中之饒朽骨。豈知陌上之  
有遊魂。假使百年兮上壽。又何足以存存。

悲昔遊

三悲曰。奇峯合沓半隱天。綠蘿蒙蘂水潺湲。因嵌巖以爲室。就芬芳以列筵。川谷縈迴兮迷徑路。山嶂重  
複兮無人煙。當豁豁之洞壑。臨泱泱之奔泉。中有幽憂之子。長寂寞以思禪。暮色躊躇。朝思緜緜。形半生  
而半死。氣一絕而一連。自言少年遊宦。來從北燕。淮南芳桂之嶺。峴北明珠之川。東魯則過仲尼之故宅。  
西蜀則耕武侯之薄田。舊鄉舊國白雪。邊飛雲。飛蓬暗遠天。暫辭薊北。千萬里。少別昭邱。  
三十年。昔時人物都應謝。聞道城隍今可憐。忽憶揚州揚子津。遙思蜀道蜀橋人。鴛鴦渚兮羅綺月。茱萸

灣兮楊柳春烟波淼淼帶平沙。開棧連延狹復斜。山頭交讓之木。浦口同心之花。嚴君平之卜肆。戴安道之貧家。月犯少微。弔吳中之隱士。星干織女。乘海上之仙槎。長安綺城十二重。金作鳳凰銅作龍。蕩蕩千門如錦繡。巖巖雙闕似芙蓉。題字於扶風之柱。繫馬於驪山之松。灞池則金人列岸。太華則玉女臨峯。平明共戲東陵陌。薄暮遙聞北闕鐘。洛陽大道何紛紛。榮光休氣曉氤氳。交衢近接東西署。複道遙通南北軍。漢帝能拜嵩邱石。陳王巧賦洛川雲。河水河橋木蘭拽。金閨金谷石榴裙。曾入西城看歌舞。也出東郊送使君。一朝憔悴無氣力。暴骸委骨龍門側。當時相重若鴻鐘。今日相輕比蟬翼。一本有嗚字。代情兮其此何。余哀之能得。使我孤猿哀怨。獨鶴驚鳴。羅月寡色。風泉罷聲。嗟吳天之不弔。悲后土之無情。松架森沈兮。戶內掩石樓摧折兮。柱將傾。竊不敢當雨露之恩。惠長痛恨於此生。

悲今日

四悲曰。傾蓋若舊。白頭如新。嘗謂談過其實。辨而非真。自高枕箕穎。長揖交親。以薰蘭爲九族。以風烟爲四鄰。朝朝獨坐。唯見羣峯合沓。年年孤臥。常對古樹輪囷。相弔相哭。則有饑饉啼夜。相慶相賀。則有好鳥歌春。林巒變兮多鹿。山蒼蒼兮少人。時向南西。一作溪汲水。或就東巖負薪。百年之中。皆爲白骨。千里之外。時見黃塵。平生連袂。宿昔銜杯。談風雲於城闕。弄花鳥於池臺。皆是西園上客。東觀高才。超班匹賈。含鄒吐枚。一琴一書。校奇蹤於既往。一歌一詠。垂妙製於將來。絃將調而雪舞。筆屢走而雲迴。自謂蘭交永合。松契長并。通宵扼腕。終日盱衡。罵蕭朱爲賈豎。目張陳爲老兵。悲蒼黃兮驟變。恨消長之相傾。貴而不驕。

人皆共推晏平仲。死且不朽。吾每獨稱范巨卿。及其蹇產摧聯。支離括撮。已濡首兮將死。尙搖尾兮求活。莊西貸而魚窮。姬東徂而狼跋。今皆慶弔都斷。存亡永闕。憑駟馬而不追。寄雙魚而莫達。向時之清談尙在。一作今日之相知已末。一作則有河濱漂母。隴上樵夫。盤飧帶粟。粥麪兼麩。藜羹一盞。濁酒一壺。夫負妻戴。男歡女娛。攀重巒之峇嶸。歷飛澗之崎嶇。哀王孫而進饋。問公子之所須。因謂余曰。可憐哉。一作哀可憐聖人之過久矣。君子之罪多焉。詩書禮樂。適足衰人之神用。宗族朋友。不足駐人之頽年。削跡伐樹。孔席由來不暖。摩頂至踵。墨突何時有烟。一朝至此。萬事徒然。自昔相逢。把臂談元。橫雕龍於翠瓦。飛綺鳳於瓊筵。各自雲騰羽化。谷變鶯遷。鳴香車於闕下。曳珠履於君前。豈憶荒山之幽絕。甯知枯骨之可憐。傳與千秋萬古。寄言白日黃泉。雖有羣書萬卷。不及囊中一錢。

悲人生


五悲曰。禮樂旣作。仁義不僂。死生有命。富貴在天。一變一化。一虧一全。去其外物。歸於內篇。一作歸其儒與道兮。方計於前。其書萬卷。其學千年。鐘鼓玉帛。鼙鼓鞀鞀。金木水火。混合推遷。六合之內。慕其風兮。如市百代之後。隨其流兮。若川三界九地。往返周旋。四生六道。出沒牽聯。碾磑。磕磕。蠢蠢。翻翻。受苦受樂。可悲可憐。有超然之大聖。歷曠劫以爲期。戒定慧解。非因人入。一作陰慈悲喜捨。非見思聞。儒道之高論。乃撞鐘而應之曰。止。止。善男子。觀向時之華說。乃天下之辨士。請弄宜僚之丸。以合兩家之美。若夫正君臣。定名色。威儀俎豆。郊廟社稷。適足跨耀時俗。奔競功名。使六義相亂。四海相爭。我者遺其無我。生者哀其無



生孰與乎。身肉手足。濟生人之塗炭。國城府庫。恤貧者之經營。捨其有愛。以至於無愛。捨其有行。以至於無行。若夫呼吸吐納。全身養精。反於太素。飛騰上清。與乾坤合其壽。與日月齊其明。適足增長諸見。未能永證無生。孰與夫離常離斷。不始不終。恆在三昧。常游六通。不生不住。無所處。不去不滅。無所窮。放毫光而普照。盡法界與虛空。苦者代其勢苦。蒙者導其愚蒙。施語行事。未嘗稱倦。根力覺道。不以爲功。所言未畢。儒道二客。離席再拜。稽首而稱曰。大聖哉。正晚聞道。聃今已老。徒知其一。未究其術。何異夫戴盆望天。倚杖逐日。蒼蒼之氣未辨。昭昭之光已失。嗚呼。優優羣品。遑遑衆人。雖鑿其竅。未知其身。來從何道。去止何津。誰爲其業。誰作其因。一翻一覆。兮如掌。一生一死。兮若輪。不有大聖。誰起大悲。請北面而趨伏。願終身而教之。

獄中學騷體

夫何秋夜之無情兮。皎晶悠悠而太長。圓戶杳其幽邃兮。愁人披此嚴霜。見河漢之西落。聞鴻雁之南翔。山有桂兮桂有芳。心思君兮君不將。憂與憂兮相積。歡與歡兮兩忘。風嫋嫋兮木紛紛。凋落葉兮吹白雲。寸步千里兮不相聞。思公子兮日將曛。林已暮兮鳥羣飛。里門掩兮人徑稀。萬族皆有所託兮。蹇獨淹留而不歸。



# 盧昇之集卷五

騷

釋疾文并序

余羸臥不起。行已十年。宛轉匡牀。婆娑小室。未攀偃蹇柱。一臂連蹠。不學邯鄲步。兩足匍匐。寸步千里。咫尺山河。每至冬謝春歸。暑闌秋至。雲壑改色。烟郊變容。輒輿出戶庭。悠然一望。覆幬雖廣。嗟不容乎此生。亭育雖繁。恩已絕乎斯代。賦命如此。幾何可憑。今爲釋疾文三篇。以貽諸好事。蓋作易者。其有憂患乎。刪書者。其有栖遑乎。國語之作。非警叟之事乎。騷文之興。非懷沙之痛乎。吾非斯人之徒歟。安可默而無述。故作頌曰。

粵若

粵若稽古。帝列山兮。遠矣大矣。臣太岳兮。欽哉良哉。有太公兮。卷舒龍豹。奄經營乎四履。有先生兮。乘騎日月。期汗漫乎九垓。尚書抗節兮。屬炎靈之道喪。中郎含章兮。遇金行之綱頽。彼聖賢之相續。信古往而今來。人何代而不貴。代何人而不才。鬱律蠲吻兮。似崑陵之玉石。泮渙粲爛兮。象星漢之昭回。爾其爲廣也。碧海雲蒸而地合。爾其爲峻也。赤城霞起而天開。暨中朝之顛覆。家不墜乎良箕。紹金柯而玉秀。穆蘭馨而菊滋。彌九葉而逮余兮。代增麗以光熙。清風振乎終古。妙譽薰乎當時。皇考慶余以弄璋兮。肇錫予

以嘉詞名余以照鄰字余以昇之余幼服此殊惠兮遂閱禮而聞詩於是裹糧尋師囊裳訪古探舊篆於南越得遺書於東魯音一作有缺而必刊簡無文而咸補入陳適衛百舍不厭其栖迫累繭重貶千里不辭於勞苦既而屠龍適就刻鵠初成下筆則烟飛雲動落紙則鸞迴鳳驚通李膺而竊價造張華而假名郭林宗聞而心服王夷甫見而神傾俯仰談笑顧盼縱橫自謂明主以令僕相待朝廷以黃散爲輕及觀國之光利用寶玉謁龍旗於武帳揮鳳藻於文昌先朝好吏予方學於孔墨今上好法予晚受於老莊彼圓鑿而方柄吾知齟齬而無當是時也天子按劍方有事於八荒駕風輪而梁弱水飛日馭而苑扶桑戈船萬計兮連屬鐵騎千羣兮啓行文臣鼠竄猛士鷹揚故吾甘栖栖以赴蜀分默默以從梁其後雄圖甫畢登封禮日方欲訪高議於雲臺考奇文於石室銷兵車兮爲農器休牛馬兮崇儒術屢下蒲帛之書值余有幽憂之疾蓋有才無時亦命也有時無命亦命也命也自前代而痛諸道之乖也則賢人君子伏斧鑕而不暇時之來也則屠夫餓隸作王侯而有餘三仁猖狂兮爲奴爲戮八子狼狽兮爲醜爲蕘長劍以攜尙想華亭之鶴孤舟欲近遙憶閩門之魚史遷下於蠶室鄧艾徵於檻車康旣幽而魏孫登宜屢困而慙甯遽故有閉門少事蹈滄海而辭組開卷獨得歸茂陵而著書起清流之浩漫長願嗟乎靈胥重曰積怨兮累息茹恨兮吞悲怨復怨兮坎壈乎今之代愁莫愁兮侘傺乎斯之時皇穹何親兮誕而生之后土何私兮鞠而育之何故邀余以好學何故假余以多辭何余慶之不終兮當中路而廢之彼有初而鮮克兮賢者其猶不欺況陶鈞之匠物胡不貞而諒之豈其始終爽德蒼黃變色無心意乎簪履有悲哀

乎楊墨已焉哉。天蓋高兮不可問。地蓋廣兮不容人。鐘鼓玉帛兮非吾事。池臺花鳥兮非我春。寂兮寞歲。歲年年。長少樂。慳兮慳。朝朝暮暮。生白髮。愴兮愴。恨兮無所見。宛轉聯蹼兮獨向隅。狀若重狴。圓扉之受。純。又似乾池。涸井之相濡。鸞鳳之翻已。鑿兮徒奮迅於籠檻。騏驎之足已蹇兮。空悵望於廷衛。龍門之桐。半死。鄧林之木全枯。苟含情而稟氣兮。孰能不傷心而疾首乎。歌曰。歲將晏兮歡不再。時已晚兮憂來多。東郊絕此麒麟筆。西山祕此鳳凰柯。死去死去今如此。生兮生兮奈汝何。

### 悲夫

悲夫。事有不可得而已矣。是以古之聽天命者。飲淚含聲而就死。推不言兮。焚於介山。妃不偶兮。沈於崑水。仰天而嘆。負憤骨於吳江。下淚交頤。卿悲歌於燕市。天無雷兮。開蟻聚於牀下。家非牧兮。見特生於奧裏。支離疏之五管已敗。哀駘它之六骸不美。求時夜兮。求鴉炙。何逼迫之如此。爲鼠肝兮。爲蟲臂。何煨燻之如彼。鬱拂沕滑兮。中替亂。蟪薄煩冤兮。長憤惋。出戶庭兮。遊息千萬里兮。無極。杳兮。霑川。曠兮。水如帶。聊兮。籟山。嘒兮。雲似蓋。萋兮。綠春草。生兮。長河曲。試一望兮。心斷續。晚兮。晚夕鳥。沒兮。平郊遠。試一望兮。魂不返。靡蕪葉兮。紫蘭香。欲往從之。川無梁。日云暮兮。涕沾裳。松有蘿兮。桂有枝。有美一人兮。君不知。氣欲絕而何爲。孟夏兮。恢台。楊柳散兮。芙蓉開。葉初成兮。蠶宛轉。花落盡兮。燕徘徊。望夫君兮。不來。形枯槁兮。意摧頹。天何爲兮。愁苦。麥將秀兮。多風。梅將黃兮。屢雨。日色旰爛兮。流金而燦石。地氣煖煜兮。滿室而充戶。神翳翳兮。似灰。命緜緜兮。若縷。一伸一屈兮。比艱難乎。尺蠖。九生九死兮。同變化乎。盤古。萬物。

繁茂兮此時。余獨何爲兮。腸迴迴而屢腐。圍棋廢兮。時不可乎再來。鳴琴停兮。人何時以重撫。秋風起兮。野蒼蒼。兼葭變兮。露爲霜。蟬悲翳兮。聲斷。雁迷雲兮。路長。摧折蕭條兮。林寡色。顛顛芸黃兮。草不芳。停劍兮。懷舊友。天外兮。思故鄉。願一見兮。終不得。側身長望兮。淚浪浪。遙兮。遠山谷。縈迴兮。屢轉狀。若登薊門兮。望胡苑。斷兮。連井邑。邱墟兮。知幾年。又似登隴首兮。見秦川。木葉落兮。長年悲。紅顏謝兮。鬢如絲。王孫來兮。何遲遲。思公子兮。涕漣漣。風嫋嫋兮。雨淒淒。螢火飛兮。烏夜啼。牽牛西北兮。星已轉。織女縱橫兮。河欲低。秋夜迢迢兮。秋未極。愁人耿耿兮。愁不息。有所思兮。在天漢。欲往從之兮。無羽翼。鬱金枕兮。木蘭舟。青莎裳兮。白羽裘。戲綠波兮。坐芳洲。歡不停兮。人不留。悵容與兮。徒離憂。元冬慘兮。陰氣凝。沸泉結兮。炎洲冰。郊野昏兮。寒沙漲。河海暗兮。繁雲興。嚴風急兮。密雪下。墟戶閉兮。無留者。眇城郭兮。瓊爲樹兮。玉爲樓。瞻通路兮。駕素車兮。乘白馬。時眇眇兮。歲冥冥。晝杳杳兮。夜丁丁。庭有霜兮。月華白。室有人兮。燈影青。披重衾兮。魂悄悄。臥空牀兮。目熒熒。御燠爐兮。長不暖。對卮酒兮。憂恆滿。悲繚繞兮。從中來。愁纏綿兮。何時斷。重曰。四時兮。代謝。萬物兮。遷化。聽春鳥於春朝。聞秋蟲於秋夜。花覆地兮。無代一作。河傾天兮。不借。無靈草兮。駐朽質乎。千年。無雕戈兮。迴踐烏乎。三舍。夏日長兮。繩繩。炎風暑雨兮。相蒸。草木扶疏兮。如此。余獨蘭單兮。不自勝。元月兮。祁寒。窮急景兮。摧殘。霰雪霧霧兮。長委積。人事寥寥兮。恨漫漫。春夏秋冬兮。四序。寒暑榮悴兮。萬端。春也。萬物熙熙焉。感其生而悼其死。夏也。百草榛榛焉。見其盛而知其闕。秋也。嚴霜降兮。殷憂者爲之不樂。冬也。陰氣積兮。愁顏者爲之鮮歡。聖人知性情之紛糾。故嘆之曰。余欲無言。吾

將焉往而適耳。箕有峯兮，穎有瀾。歌曰：歲去憂來兮，東流水。地久天長兮，人共死。明鏡羞窺兮，向十年。駿馬停驅兮，幾千里。麟兮鳳兮，自古吞恨無已。


命曰

命曰：昊天不備兮，降此鞠凶。昊天不惠兮，降此大戾。不先不後兮，爲瘳爲療。痛之撫兮，孰知其厲。木之柔兮，緝之絲。人之溫兮，繡之藻。之自天佑之兮，無不利。一者之來兮，云何二。野有鹿兮，其角旣旣。林有鳥兮，其羽習習。余獨何爲兮，悲攢欒兮，憂香香。南山龍嵒兮，樹輪囷。北津清泚兮，石嶙嶙。天之生我兮，胡甯不辰。少克已而復禮，無終食兮，遠仁。旣好之以正直兮，諒無負於神明。何彼天之不弔兮，哀此命之長勤。百罹兮，六極橫集兮，我身長擘。罔以偃蹇，永伊鬱以呻嘯。天道何從，自古多邛。爲臧兮，匪祐。匪仁兮，覆庸。躡很戾兮，南池。跖叛渙兮，東風。一作並強大兮，熏赫。咸壽考以從容，勳則天兮，朱已矣。詔盡美矣，均忽焉。公侯之系兮，必復堯舜之後兮，何慙。干執諫兮，辛載。蕃抗議兮，靈年。忠與貞兮，何仇。俱不得其死焉。牛一變而爲虎，鼈三化而作鵠。觸氏居蝸而爭地，龍伯釣鼈而訴天。何變化之殊族，而大小之相懸。長無述焉，將不死而爲賊。賢哉回也，今不幸而早亡。明夷何辜兮，姜里。洪範何恃兮，佯狂。我視於天兮，亦孔之瘵。一作孔與溺兮，殊貫。單與張兮，相詭。紛紜總總兮，若茲。光未得其元已，盛之孝兮，姚何感而遂開。合之恭兮，昆何嫌兮，不起。聖人不議，姬且憤於鴟鴞。君子無憂，周南歌於芣苢。五鹿云折，退守平陵之田。三都已成，歸入宜春之里。乾不穆兮，一爲戌。一爲辰，坤不恆兮，三成田。三成水，何斯柱之危脆。一夫觸之，而云折。東

南眇其既傾。西北壑其中裂。有杞者國。竟未掬其烏蟾。有歷其都。奄以成其魚鼈。共何壯兮而損其盈。媯何神歟而補其闕。天且不能自固。地且不能自持。安得而育萬物。安得而運四時。彼山川與象緯。其孰爲之主。司生也既無其主。死也云其告誰。何必拘拘而跼跼。一本有固字。可浩然而順之。吾知惡之不能爲惡。故去之曰羣生之所蠹。吾知善之不能爲善。故就之曰有生之大道。雖粉骨而糜軀。終不改乎此度。重曰。予既昧此杳冥兮。迷之不知其所屈。將寄命於六師。訪真訣乎遐外。一作見建。流星以爲旗。邀白雲而爲蓋。玉虬紛其旖旎。青鸞儼其容裔。寬爲裳兮羽爲旗。雷爲車兮電爲旆。噉噉兮上馳。遙遙兮橫厲。忽若夢兮有覺。與巫陽兮相會。巫陽爲予兮潔一作擊。龜告余以雙支。朱雀搖而金躍。青龍發而火馳。地登樓一作樓兮。雞入穴。雲北走兮水西垂。巫陽曰。反兮覆兆不告。靈蔡誠不能知造化之心數。朽骨焉足以定古今之倚伏。請導列缺之前旌。一作陪。豐隆之後轂。披上帝之元鍵。考中皇之祕籙。於是排雲旌兮。叫諸闕。登紫翠兮。伏瑤壇。靈鳥杳其將駕。東皇釐其既觀。余數衽而未決兮。東皇頷而不言。玉女申之以瓊藥。靈妃賦之以琅玕。悵容輿而不駐。肅雲駟於南軒。窈窕徘徊。邈矣悠哉。下臨兮星雨。上絕兮氛埃。彷徨兮三清之館。縹緲兮八風之臺。俯觀兮故國。洞崢嶸兮無極。長懷兮故人。涕滂浚兮霑軾。橫天苑。歷北辰。經瑤市。一作樓。樓兮一息。停余車之嶙嶙。涉明河之清淺。過織女而問津。巫陽曰。左招搖兮右天駟。太乙之車居一作居兮。無不利其道也。楓爲天兮棗爲地。盡往從之兮。導君意。太乙方握髻低眉。右手拄頤。或以日臨命以歲加時。再轉兮再考。三命兮三推。華蓋微明兮。君子居貞之位。太陽陰主兮。天人厄運之期。若夫一氣鴻濛。萬化緇



釐此星精與木局。又何足以知之。巫陽曰。太上有老君焉。其名曰伯陽。游閭風之瓊圃。處倒景之琳堂。披拂日月。咀嚼烟霜。撫千載兮爲朝。爲暮。濟萬物兮若存若亡。古之聰明博達而不死者。將與君子造崑崙之大荒。迨而容與。引節翺翔。俄參元而下降。濟弱水之湯湯。隣軒臺而右轉。對玉檻之鏘鏘。伯陽欣然見余曰。昇之來何遲。何故疲憊之如是。何故枯槁之若茲。吾適以爾小別。今將千二百壽。昔者爾爲翟。吾固知爾潔潔焉無益。其後爾爲舟。吾欲告爾休休焉不留。爾名已登乎仙格。爾身常塞乎中州。噫哉。甚可痛甚。可哭。多智也。命之斧斤。多才也。身之桎梏。爾形體之在地也。每矍矍然求媒。精魂之於天也。又遑遑焉訪卜。何異儀丹鳳於膠柱。飼元魚於森木。何晚晤悟一作之逶迤。何早計之殼鯨。嗚呼。何異喪其親也。揭竿而求諸海。失其子也。擊鼓而訪諸道。途之遠矣。曷其云蘇。與影捕逐。可不謂悲乎。夫道之動也。紛紛狢狢。靜也。若喪若失。嚙兮不以死生爲二塊兮。若以天地爲一生。於萬物之後。不爲緩。死於太古之前。不爲疾。弊萬類也。不謂之凶。利四海也。不謂之吉。夫如是。則巨浸稽天而不溺。鴻災治地而不然。生死不能爲其壽夭。變化適足寄其騰遷。化而爲魚也。則躍龍門而橫碣石。化而爲鳥也。則培羊角而負青天。爲社也。則長無斤斧之患。爲瓠也。則汎乎泱泱之川。物無可而不可。何必守固以拳拳。余於是乎嗒然而喪其偶。條爾而失其知。思故池之淥水。憶中園之桂枝。栩栩然若有得。茫茫然若有亡。嘆彷彿兮覺悟。魂已歸乎北鄉。其往也。人皆爲之避席。其返也。鳥不爲之亂行。歌曰。茨山有薇兮。潁水有漪。夷爲柏兮。秋有實。叔爲柳兮。春雨飛。條爾而笑。汎滄浪兮不歸。



# 盧昇之集卷六

序

駙馬都尉喬君集序

昔文王既沒。道不在於茲乎。尼父克生。禮盡歸於是矣。其後荀卿孟子。服儒者之喪衣。屈平宋玉。弄詞人之柔翰。禮樂之道。已顛墜於斯文。雅頌之風。猶緜聯於季葉。痛乎王澤既竭。諸侯爲糜鹿之場。帝圖伊桎。天下作豺狼之國。秦人一滅舊章。大愚黔首。羣書赴火。化崑岳之高烟。儒士投坑。變蓬萊之巨壑。樂沈於海。河間王初睽睽於古篇。禮適一作失。諸夷。叔孫通乃區區於絳繅。安國討論科斗。五典叶從。史遷祖述。獲麟。八書爰創。衣冠禮樂。重聞三代之風。玉帛謳歌。無墜六經之業。鬱其興詠。大雅於是爲羣。自此迄今。年逾千祀。聖門論賦。相如爲入室之雄。闕里裁詩。公幹卽升堂之客。陸平原龍驚學海。浮天泉以安流。鮑參軍鶴。竊文場。代黃金之平墀。臨曲臺之上路。而通衢之小苑。蓮紅水碧。堪釣叟之淹留。桂白山青。宜王孫之攀折。香車貴士。不掩龍關。縫掖書生。時通驛騎。坐蘭徑。敞松扉。北牖動而清風來。南軒幽而白雲起。欣然命駕。弔曲江之墜淵。典盡而歸。聆伊川之笙吹。三朝慶謁。趨劍履於南宮。五日歸休。聞歌鐘於北里。雍容車騎。屢動雕章。嘯傲烟霞。仍涵寶思。奢不敗德。笑金谷之羅紈。儉不邀名。悲蘭陵之芻布。榮期三樂。君實四之。平子四愁。我無一矣。君教訓子弟。不讀非聖之書。撫愛家僮。常恐名奴之辱。婚嫁已畢。欲就金丹。

輪蓋非榮，猶思道樹。明霞曉挹，終登不死之庭。甘露秋團，儻踐無生之岸。凡所著述，多以適意爲宗。雅愛清靈，不以繁詞爲貴。足以傳諸好事，貽厥孫謀。故撰而存之，凡爲若干卷云爾。

南陽公集序

昔者龍躡東魯，陳禮樂而救蒼生。虎據西秦，焚詩書以愚黔首。通其變，參天二地，謂之神。合其機，一陰一陽，謂之聖。是以楚漢方圖，蕭曹絳灌，負長劍於此時。袁曹已平，徐陳應劉，弄柔翰於當代。聖人方士之行，亦各異時而並宜。謳歌玉帛之書，何必同條而共貫。文質再而復，殷周之損益足徵。驪翰三而改始，一作虞夏之興亡可及。美哉煥乎，斯文之功大矣。自獲麟絕筆，一千三四百年，游夏之門，時有荀卿孟子、屈宋之後，直至賈誼相如、兩班敘事、得邱明之風骨。二陸裁詩，含公幹之奇偉。鄴中新體，共許音韻天成。江左諸人，咸好瓌奇，一作豔發精博，爽麗顏延之急病於江鮑之間。疎散風流，謝宣城緩步於向劉之上。北方重濁，獨盧黃門往往高飛。南國輕清，惟庾中丞時時不墜。嗟乎，古今之士，遞相毀譽，至有操我戈矛，啓其墨守。三都旣麗，徵夏熟於上林。九辯已高，責春歌於下里。踳駁之論，紛然遂多。近日劉勰文心，鍾嶸詩評，異議蜂起，高談不息。人慙西氏，空論拾翠之容。質謝南金，徒辨荆蓬之妙。拔十得五，雖曰肩隨。聞一知二，猶爲臆說。一作俞俞曰：未可。人稱屢中化魯成魚，曷云其遠。非夫妙諧鐘律，體會風騷，筆有餘妍，思無停趣。作龜作鏡，聽歌曲而知亡。爲龍爲光，觀禮容而識大。齊魯一變之道，唐虞百代之文。懸日月於胸懷，控風雲於毫翰。舍今古之制，扣宮徵之聲。細則出入無間，粗則彌綸區宇。逶迤綽約，如玉女之千嬌。突兀崢嶸，似

靈龜之孤朴乘槎上漢。誰問坳塘之淺深。荷戟入秦。甯議長安之遠近。是非未定。曹子建皓首爲期。離合俱傷。陸平叔終身流恨。超然若此。適可操刀。自茲以降。徒勞舉斧。八病爰起。沈隱侯永作拘囚。四聲未分。梁武帝長爲豐俗。後生莫曉。更恨文律煩苛。知音者希。常恐詞林交喪。雅頌不作。則後死者焉得而聞乎。貞觀年中。太宗外厭兵革。垂衣裳於萬國。舞干戚於兩階。留思政塗。內興文事。虞李岑許之儔。以文章進。王魏來褚之輩。以材術顯。咸能起自布衣。蔚爲卿相。雍容侍從。朝夕獻納。我之得人。於斯爲盛。虞博通萬句。對問不休。李長於五言。下筆無滯。岑君論誥。一作。壺壺聽者忘疲。許生章奏。翻翻談之未易。王侍中政事精密。明達舊章。魏太師直氣鯁詞。兼包古義。來字。褚河南風標特峻。早鏘聲於冊府。變風變雅。立體不拘於一塗。旣博旣精。爲學遍游於百氏。自豸冠指佞。雞樹登賢。內掌機密。外脩國史。晨趨有暇。持綵筆於瑤軒。夕拜多閒。弄雕章於琴席。含毫顧盼。漢家之城闕。風煙逸韻。縱橫秦地之林泉。魚鳥黃山羽獵。幾奏瓊簫。汾水樓船。參聞寶思。南津弔屈。去逐蒼梧之雲。西路悲昂。來挽蔥巖之雪。江湖廊廟。造次不忒。其儀沙塞朝廷。顛沛必歸於漢。是使名流俱至。免輸闔門。愛客相尋。鷄談滿席。嚶嚶好鳥。花欲白兮柳將非。澈澈游魚。蓮將紅兮蘋可望。綠樽恆湛。齋開臨霞。綺札逾新。園亭坐月。凡所著述。千有餘篇。今之刊寫。成三十卷。早遊西鎬。及周史之闕文。晚臥東山。憶漢庭之遺事。平津侯之賓館。馬廐蕭條。李司隸之仙舟。龍門荒毀。交交黃鳥。集於栩兮。集於桑營。蒼蠅止於樊兮。止於棘。九原可作。松有隧兮。兔有塹。三湘不追。川無梁兮。鳥無徑。輟斤之懶。何獨莊周。聞笛而悲。甯惟向秀。徒勤觀海。未知渤澥。一作之倪。永好談天。

莫究氤氳之數。遂抽短翰爲之序云。

樂府雜詩序

聞夫歌以永言。庭堅有歌虞之曲。頌以紀德。奚斯有頌魯之篇。四始六義。存亡播矣。八音九闕。哀樂生焉。是以叔譽聞詩。驗同盟之成敗。延陵聽樂。知列國之典彝。王澤竭而頌聲衰。伯功衰而詩道缺。秦皇滅學。星瑄千年。漢武崇文。市朝八變。通儒作相。徵博士於諸侯。中使驅車。訪遺編於四海。發詔東觀。縫掖成陰。獻書南宮。丹鉛踵武。王風國詠。共驪翰而升沈。里頌途歌。隨質文而沿革。以少卿長別。起高唱於河梁。平子多愁。寄遙情於壘坂。南浦動關山之役。作者悲離。東京興黨錮之誅。詞人哀怨。其後鼓吹樂府。新聲起於鄴中。山水風雲。逸韻生於江左。言古興者。多以西漢爲宗。議今文者。或用東朝爲美。落梅芳樹。其體千篇。隴水巫山。殊名一意。亦猶負日於珍狐之下。沈瑩於燭龍之前。辛勤逐影。更似悲狂。罕見鑿空。曾未先覺。潘陸顏謝。蹈迷津而不歸。任沈江劉。來亂轍而彌遠。其有發揮新體。孤飛百代之前。開鑿古人。獨步九流之上。自我作古。粵在茲乎。樂府者。侍御史賈君之所作也。君升堂入室。踐龜字以長驅。藏翼蓄鱗。展龍圖以高視。林宗一見。許以王佐之才。士季相看。知有公卿之量。南國蛟龍之懼。下觸詞鋒。東家科斗之書。來遊筆海。朝陽弄翮。卽踐中京。太行垂耳。先鳴上路。當赤縣之樞輪。作高臺之羽儀。動息無格於溫仁。顛沛定由乎正義。玉階覆奏。謹依汲直之聞。銅術埋輪。先定雍門之罪。霜臺有暇。文律動於京師。繡服無私。錦字飛於天下。九成宮者。天子之殊庭。羣仙之一都也。五城旣遠。得崑閩於神京。三山已沈。見蓬萊於古

輔紫樓金開雕石壁而鏤羣峯碧甃銅池俯銀津而橫衆壑離宮地險丹磳四周微道天迴翠屏千仞衛尉寢蒙茸之署將軍無刁斗之警中巖罷煨飛霜以之夏凝太谷生寒層淮以之秋沍天子萬乘驅鳳輦於西郊羣公百僚扈龍軒而北輔春秋絡繹冠蓋滿於青山寒暑推移旌節喧於黃首一作道夕宿雞神之野朝登鳳女之臺青鳥時飛白雲無極千年啓聖逸同汾水之陽七日期仙頗類維山之曲經過者徒知其美揄揚者未歌其事恭聞首唱遂屬洛陽之才俯視前修將麗長安之道平恩公當朝舊相一顧增親行翰墨之林光標唱和之雅於是懷文之士莫不嚮風靡然動麟閣之雕章發鴻都之寶思雲飛綺札代郡接於蒼梧泉湧華篇岷波連於碣石萬殊斯應千里不違同晨風之歛北林似秋水之歸東壑洋洋盈耳豈徒懸魯之音郁郁文哉非復從周之說故可論諸典故被以笙鏞爰有中山郎餘令雅好著書時稱博物探亡篇於古壁徵逸簡於道人撰而集之命余爲序時褫巾三蜀歸臥一邱散髮書林狂歌學市雖江湖廊廟賓廡蕭條綺季留侯神交髣髴遂復驅偃幽憂之疾經緯朝廷之言凡一百一篇分爲上下兩卷俾夫舞雩周道知小雅之歡娛擊壤堯年識太平之歌詠云爾

宴梓州南亭詩序

梓州城池亭者長史張公聽訟之別所也徒觀其巖嶂重複川流灌注雲窗綺閣負繡堞之逶迤澗戶山樓帶金隍之繚繞信巴蜀之奇制也時鳳辰多閒上得和平之政鯁瀛有截下無交爭之人以公寄切上僚故久無州將連四千石之重任總十萬井之雄班職逾劇而道彌高位逾崇而德彌廣市獄無事時狎

鳥於城隅，邦國不空。且觀魚於濠上，賓階月上。橫聯蜚之桂枝，野院風歸。動葳蕤之萱草，則有明珠愛客。置芳酒於十旬，羽服神交。契仙游於五日，圓潭寫鏡。光浮落日之津，雜樹開帷。彩綴飛煙之路，藤蘿杳藹。挂疎陰以送秋，鳧雁參差。結流音而將夕，百年之歡不再。千里之會何常，下客悽惶。暫停歸轡，高人賞翫。豈輟斯文，咸謂賦詩六韻成章。一作以紀盛集云爾。

宴鳳泉石翁神祠詩序

夫圯上高公，靈期已遠。湘中元乙，化跡難徵。況乎神理歸然，近帶青溪之路。瓌姿可望，俯控丹巖之下。予以歸骸空谷，言隔市朝。濯髮長川，載離寒暑。心灰兩寂，長無具爾之歡。形木雙枯，將有終焉之志。不悟喬羸始喞，喞喞於鵲鶴。野萼初開，鞞鞞於棠棣。命壺觴而引宴，卽沐新蘭。尋欄戶以安歌，仍攀野桂。萋萋春草，王孫游兮不歸。秩秩斯干，幽人去而忘返。鼓我舞我，修袖滿於中巖。神之聽之，多祐興於觸石。爰有嘉命，咸遣賦詩。請題四韻，列之如左。

七日蘇州泛舟詩序

諸公迹寓市朝，心游江湖。訪奇交於千里，惜良辰於寸陰。常恐辜負琴書，荒涼山水。於是脫屣人事，鳴榔川隅。言追挂犢之才，用卜牽牛之賞。邊生經筭，送炎氣以濯纓。郝氏書囊，臨秋光而曝背。似遇緱山之客，還疑星漢之游。願駐景於高天，想乘霓於縮地。繁絲亂響，涼酎時斟。戲翔羽於平沙，釣潛鱗於曲浦。乘流則逝，不覺忘歸。咸可賦詩，探韻成作。



楊明府過訪詩序

夫清風動駕。謁阮籍於山陽。素雪乘舟。訪戴逵於江路。猶名高好事。迹標良史。未有鶯臨綺月。筵開許郭之談。花聚繁星。門枉荀陳之馭。泛烟光於紫瀨。翻露色於丹滋。亭皋一望。平蕪千里。萋萋芳草。童兒牧馬之場。疊疊晴川。野老休牛之塔。釣臺隱隱。先生之桑梓可知。茨嶺巖巖。隱士之風流尚在。豈使臨邛樽酒。歌賦無聲。彭澤琴書。田園寢詠。

對問

對蜀父老問

龍集荒落。律紀蕤賓。余自鄴鎬歸於五津。從王事也。丁丑。屆於昇僊橋。止一作送客亭。卽相如所謂不乘高車駟馬。不出汝下者也。遇蜀父老。皤然龐眉。華髮者。休於斯。謂余曰。子非衣冕之族歟。文章之徒歟。飾仁義以干時乎。懷詩書以邀名乎。吾聞諸夫子曰。邦有道。貧且賤焉恥也。當今萬方日朗。一作九有風靡。主上垂衣裳。正南面而已矣。庸非有道乎。而子爵不登上造。位不至中涓。藜羹不厭。菹謁不全。庸非貧賤乎。吾視子形容顛頽。顏色疲惫。心若涉六經。眼若營四海。何其無恥也。何其不一干聖主。效智出奇。何栖栖默默。自苦若斯。吾聞克爲卿。失則烹。何故區區。穴穴無所成名。余笑而應之曰。井魚不可以語於溟者。拘於墟也。夏蟲不可以語於冰者。篤於時也。蓋聞智者不背時而微幸。明者不違道以干非。是以聖賢馳驚。莫救三家之微。一作匹夫高抗。不屈萬乘之威。道在則簞瓢匪陋。義存則珪組斯遠。或立談以邀鼎食。

或白首而甘布衣。或委輅而仕。屬論都之會。或射鉤以相。遇匡霸之機。亦有朝爲伊周。暮爲桀跖。當其時也。襲珩佩之鏘鏘。失其時也。委溝渠而喀喀。故使龍邱先生。羞聞擁篲。雁門太守。不如縫掖。孟軻偃蹇。爲王者師。范睢匍匐。爲諸侯客。富貴者君子之餘事。仁義者賢達之常迹。來不可違。類鴻雁之隨陽。去不可留。同白駒之過隙。行蘇張之辯於媯燧之年。則迂矣。用韓彭之術於堯舜之朝。則舛矣。守夷齊之節於湯武之時。則孤矣。抱申商之法於成康之日。則愚矣。彼一時也。此一時也。易時而處。失其所矣。大唐之有天下也。出入三代五十餘載。月竄來庭。風邱款塞。華旌已偃。羽檄已平。雖有廉白之將。孫武之兵。百勝無遺策。千里不留行。無所用也。社首旣禪。介邱旣封。創明堂。立辟雍。雖有闕里之聖。淹中之儒。叔孫通之絕。公玉帶之圖。將焉設也。咸英並作。韶武畢用。奏之方澤。而地祇登昇。之園丘。而天神降。雖有伶倫。伯夔。延陵子期。操雅曲。則風雲動。激悽音。則草木悲。又何施也。晝衣莫犯。囹圄不修。雖有皋陶。仲甫之器。釋之定國之儔。金科在握。丹筆如流。非急務也。人歸東戶。家沐南薰。山澤無蹊。隧雞犬不相聞。雖有文翁。黃霸之述。職子游子。賤之絃歌。政成禮讓。俗被雍和。固無取也。干戈已戢。禮樂已興。刑罰已措。梁父已昇。公卿常伯。庶政其凝。雖有鴻才大略。麗句豐詞。發言盈乎百代。濡翰周乎四時。略無益於今日。而適足以佛之。是故天子恭己。羣臣演成。攘袂而陵稷禹。撫掌而笑阿衡。無爲而萬物皆遂。不言而品彙咸亨。莫不稱贊鴻烈。揄揚頌聲。言殊者招累。行危者相傾。效智者輟談於草澤。出奇者裹足於山楹。許由去而堯臣不少。善卷逃而舜德不輕。夫周冕雖華。猿猴不之好也。夏屋雖崇。騏驥不之處也。載鼙以車馬。不如放之於藪穴也。

樂鷄以鐘鼓不如栖之以深林也。此數物者豈惡榮而好辱哉。蓋不失其天真也。若余者十五而志於學。四十而無聞焉。詠義皇之化。翫姬孔之編。周遊幾萬里。馳騁數十年。時復陵霞汎月。搦札彈弦。隨時上下。與俗推遷。門有張公之露突。無墨子之烟。雖吾道之窮矣。夫何妨乎浩然。今將授子以中和之樂。申子以封禪之篇。終眇慙乎指一作地。竊所慕於談天。於是蜀父老再拜而謝曰。鄙夫警陋。長自愚惑。習俗遐陬。不遊上國。聞王人之休。聽皇猷之允塞。亦猶獻雉而遇司南。銜龍而光有北。請終餘論。永告邛夔。

還書日期

61.7.200本

臺灣省立臺中國書館

61.7.20,000

臺灣省立臺中國書館

10  
8656

盧昇之集卷七

書

與在朝諸賢書

昔張子房處太傅之尊，自疏於南山隱。公孫宏居丞相之位，亦伏於東方生。伯喈已亡，孔文舉將老兵而造膝。方回尚在，王羲之就僮奴而共談。良史書之高賢，不以爲累。自古朝野曷嘗以人廢言。況下官抱疹東山，不干時事，借人唱和，何損於朋黨。延州子期，聞音竊抃，猶冀身膏丹壑，脫寶劍於山阿，骨掩黃塵，罷瑤琴於天下，則捐金抵玉於山谷者，非太平之美事乎。幽憂子白。

與洛陽名流朝士乞藥直書

幽憂子學道於東龍門山精舍，布衣藜羹，堅臥於一巖之曲。客有過而哀之者，青囊中出金花子丹方相遺之，服之病愈。視其方，丹砂二斤，穀楮子則山中可有，丹砂則眇然難致。昔在關西太白山下，一隱士多元明膏，中有丹砂八兩。予時居貧，不得好上砂，但取馬牙顏色微光淨者充用。自爾丁府君憂，每一號哭，涕泗中皆藥氣流出。三四年羸臥苦嗽，幾至於不免。復偶於他方中見一說云：丹砂之不精者，服之令人多嗽。訪知一處有此物甚佳，兩必須錢二千金，則三十二兩當取六十四千也。空山臥疾，家業先貧，老母年尊，兄弟祿薄。若待家辦，則委骨於巖崑之峯矣。意者欲以開歲五月，穀子熟時，試合此藥，非天下名流

貴族王公卿士以仁惻之心。達枯骨朽株者。孰能濟之哉。今力疾賦詩一篇。遍呈當代博雅君子。雖文不動俗事。或傷心。儻遇晏嬰。脫左驂而見贖。如逢孔子。分乘粟以相優。則越石原憲。不辛苦於當年矣。唯當坐禪念室。以答深仁。若諸君子家有好妙砂。能以見及。最爲第一。無者各乞一二兩藥。直是庶幾也。仲尼曰。有能一日用其力於仁者乎。未有力不足者。又曰。君子無終食之間違仁。在坐則參於前。在輿則倚於衡。古人心可見矣。又曰。仁遠乎哉。我欲仁。斯仁至矣。言苟能行之。仁道不遠也。朝英貴士。博濟而好仁者。何必相識。故知與不知。咸送詩告請。無按劍同掩體骸云爾。

寄裴舍人諸公遣衣藥直書

山信一作。至自都。太子舍人裴璠之。太子舍人韋方賢。左史范履冰。水部員外郎獨孤思莊。少府丞舍人

內供奉閻知微。符璽郎喬備。並有書問余疾。兼致束帛之禮。以供東山衣藥之費。嗟乎。代與道交喪。其來尙矣。般楊州與外甥韓康伯別。慨然而詠富貴。他人合貧賤。親戚離。因泣下交頤。不能自己。余以爲其人。也。名過其實。然窮達之際。則西狩獲麟。所不能免。斯亦古君子之大悲也。自鄙而下。曷足譏哉。余家咸亨中。良賤百口。自丁家難。私門弟妹凋喪。七八年間。貨用都盡。余不幸遇斯疾。母兄哀憐。破產以供醫藥。屬多一作。穀不登。家道屢困。兄弟薄遊近縣。創鉅未平。雖每分多見憂。然亦莫能取給。海內相識。亦時致湯藥。恩亦多矣。晚更篤信佛法。於山間營建。所費尤廣。本欲息貪寡欲。緣此更使貪心萌生。每得一物。輒歡喜。更恨不足。嗚呼。道惡在而奔競之若茲。雖觀苦空無常。而此業已就。不可中廢。祈獲福澤。思與士君子

共之

讚

相樂夫人檀龕讚并序

相樂夫人章氏者益州都督長史胡公之繼親也。夫人寓跡蘭闈。栖情香軸。琢磨六行。與三明而並驅。馳於四禪。將十訓而齊駕。粵以乾封紀歲。流火司辰。敬造靈龕。奉圖真相。青蓮皓月。爭華蚊睫之端。寶樹天花。競爽鴻毛之際。納須彌於纖芥。嘗謂徒言。置由旬於方丈。今過其實。重宣此義。敢爲讚云。

猗歟實相。顯允神工。規模鹿苑。圖寫龍宮。分身諦聽。列坐談空。羣天颯纒。衆寶玲瓏。雕牕引月。鏤網搖風。一窺妙境。高謝塵蒙。

益州長史胡樹禮爲亡女造畫讚

夫鎔金逞妙。徒罄中人之產。架寶崇奢。未階大乘之化。豈若圖徽紈素。卷舒方丈之筵。表裏丹青。藻繪多林之色。獨爲先覺。其在茲乎。益州長史公道洽中孚。履黃裳以貞吉。寄隆分陝。苴白茅而涉川。猶爲龜組相輝。不離泡幻之域。熊車結轍。尙迷苦愛之津。爰捨淨財。幸求多福。爲亡女宇文氏敬造像等。徵奇綉於水府。採妙色於霞莊。月面澄華。疑金雲之夜敞。蓮毫吐照。狀珠浦之晨開。花寶參差。眺鶴林其非遠。仙雲舛登。鷲巖其可望。窮形盡相。陋燕壁之含丹。寫妙分容。嗤吳屏之墜筆。式揚顯福。俾讚幽魂。其詞曰。

正教東漸。遺像西至。化格三天。功超十地。偉歟大士。宏慈遠致。追慟幽途。載營檀施。皎潔霜紈。照影丹素。

果發金口。蓮生玉步。地寶天花。星羅雲布。慧炬長設。迷津永渡。

碑

益州至真觀主黎君碑

若夫三清上列。瑤闕控日月之圖。八洞深居。貝闕吐山河之鎮。雖復扶桑大帝。傳赤字於東華。安寶神君。受青符於南極。猶未能發揮丕宰。復歸無物之功。開鑿妙門。言謝有爲之業。其馮馮翼翼。百姓存焉。而不知杳杳冥冥。萬族死之。而無愠。獨爲衆化之宗者。其唯元始天尊乎。暨乎覽鑿爲仁。跛跛爲義。鴻臚傳小儒之具。緘膝爲大盜之術。堯禹生而天下火馳。姬孔出而羣方鼎沸。則有氤氳帝祖。發皓鬢於東周。兆朕臯輿。飛紫雲於西道。鳳交開景。返徐甲之營魂。龍光照天。杜宜尼之神氣。得一吹萬。有大造於蒼生。把十蹈五。樹靈基於寶祚。能使秦皇東指。見赤舄而長懷。漢帝北遊。望青煙而下拜。於是靈山水府。俱爲鍊玉之場。甲第離宮。多入空歌之地。青牛道士。按錦節於中都。白鹿仙人。列瑤壇於八表。乃劍門西拒。邛關南望。星橋對斗。像牛漢之秋橫。月映縈城。疑兔輪之曉落。武騎遷昇之路。冠蓋雲飛。文翁講肄之堂。英靈霧聚。巖開菌桂。蘊金碧之祥光。彌吐天桃。積神仙之粹氣。至真觀者。隋開皇二年之所立也。尋屬煬帝驕淫。蜀王奢僭。冕旒多事。有慙七聖之遊。几杖不朝。未遑八仙之術。紫臺初構。霜露霑衣。碧洞新開。蓬萊變海。仙居制度。與雲雷而共屯。象帝威儀。將朝市而猶梗。皇家續戎。牝谷乘大道而驅除。盤根瀨鄉。擁真人之闕。閱高祖以汾陽如雪。當金闕之上仙。太宗以峒山順風。屬瑤京之下視。武皇帝凝旒紫閣。懸鏡丹臺。運



璇極而正乾坤坐閭陽而調風雨變銅渾於九洛鱗羽登歌鳴玉鑾於四清烟霞變色焚符破籙更開緹  
燧之初剖斗折衡重覩人倫之制銀書紀岱登日觀以論功玉牒封梁下雲邱而校美千齡胎化申以駕  
羽之期萬歲巖音獻以華封之壽畊田鑿井者不知自然鼓腹擊壤者不知帝力嗚呼豈非道風幽贊之  
效歟乃迴輿詔蹕親幸譙若谷一作幽奉策老君爲太上皇帝仍令天下諸州各置觀一所於是碧樓三襲  
上接虹蜺絳闕九成下交星雨乘雲御氣日夕於關山薦璧投金歲時於岳瀆此觀地當樞要任切會昌  
南鄰覆錦之城西逼吞珠之界使星連注皇華結轍旣而綠地榛蕪朱宮板蕩非夫位膺金策名載瓊軒  
爲紫帝之羣賓列黃庭之上格孰能居此棟梁平圃丹牖長樓大開流電之庭廣制明霞之宇觀主三洞  
法師姓黎諱某廣漢雒人也金天命秩卽有天地之官火正分司實掌羲和之任夏殷之際代爲伯相或  
食邑於魯或書社於衛故魯之黎城衛之黎陽卽其地也魏晉之交或立功於吳剖符於蜀在吳者其後  
封於壽春黎將故城有黎氏之墓石文石闕之字在焉在蜀苻堅時奉爲蜀郡太守北齊時練山爲益州  
刺史故子孫因家於蜀法師練山之六代孫也祖宗父泉並爲州郡都主簿平正七職之任蜀文公之好  
智固讓朝恩秦子整之多才終從郡辟禮儀體制鄉校取式於公曹獄訟章程府主責成於平正時無留  
事復聞坐嘯之談野有讓畊重聽行歌之樂元珠結慶剖江漢之圓流紫胞貽祉動岷精之垂曜豫章七  
歲非復常材朝陽五色豈云凡鳥初登小學笑孔墨之神勞一見元書以彭聃爲己任玉笈雲囊之術龍  
緘風蘊之圖莫不吞楚夢於胸中指魯城於掌上臨長水而飲犢不就堯徵臥巨澤而牧羊徒勞漢使冥

邱聳駕左肘符觀化之辰。諄整停裝。橫目傳栖真之地。貞觀之末。有昭慶大法師。魁岸堂堂。威儀肅肅。裂圓冠而焚俗制。橫大帳而抗山谷。聲若坻頽。辯均濤發。仲尼河目。飛電驚人。子貢斗唇。連環動坐。昂昂不雜。如獨鶴之映羣雞。矯矯無雙。狀真龍之對芻狗。於是三蜀耆老。咸相謂曰。興大道者。其在茲乎。初襲羽裙。且莅貞陽小觀。纔麾玉柄。已馳天下大名。尋而廣漢士人。固請法師爲靈集觀主。去長桑之故苑。臨隱斧之新邱。經之營之。旣雕旣琢。銀臺中天。而孤出。珠樹布地。而叢生。同赤城之建標。有黃房之貞構。觀中先有天尊真人石像。大小萬餘區。年代寔深。儀範凋缺。沈沈寶座。積萬古之塵埃。邈邈瓊顏。被千齡之苦。蘇法師觀斯而流涕曰。不圖先聖尊容。零落至此。乃重趺卽路。無肱永哀。櫛沐幾於四時。栖遑周於百舍。誓將崇輯事畢。然後寢食爲期。鄉曲爭持錢帛。競施珍寶。費餘巨萬。役不崇朝。還開紫翠之容。更表圓明之色。行益州刺史駙馬都尉喬君主壻。懿親勳門盛族。任高方面。寄切西南。法師道叶半千。神凝正一。而至真福地。荒涼日久。不有上德。其誰振之。又表請師爲至真觀主。法師升堂慷慨。吐納元科。攝齊嘹唳。分明紫訣。詞峯雲鬱。觸劍石以飛揚。義壑泉奔。橫玉輪而浩蕩。入其門者。披烟霧於九天。聞其音者。聽咸韶於三月。由是戶外之履。魚貫江水。堂下之賓。雁行關塞。黃老之學。復於今矣。則有王孫之黨。都公之倫。名亞春陵。氣高韓魏。鶴裘玉劍。散圓庭以陸離。驥子銀鞍。委山衢而沛艾。法師以茲衆施。卽於天宮後起。大講堂。并造長廊。二十餘丈。琳堂鬱其峙起。星闌忽以環周。仰窺窳以嶙峋。下崢嶸以廣朗。陰娥假道。窺玉女於南軒。陽烏迴轡。矚青禽於北關。又於觀內鑄銅鐘一口。重七十斤。立石壇三級。週迴一百步。懸黍瓊

於碧落明月流光建瓊乳於元都飛霜蓄韻壇開錦砌類江浦之澄霞庭列瑤階疑崑邱之積雪每至三辰法會八景真遊霓裳蕩耀魄之華羽蓋轉風雲之路通天互景兼造化之全模帶鳥銜虹連飛動之奇勢可謂德光而功濟道勝而名揚者也前長史范陽公一代羽儀門傾四海前長史譙國公兩朝肺腑威動百城並出一作風銀黃俱伸元素法師雍容坐鎮嘯傲行藏雖郭先生之禮峻管侯蒙莊子之身輕梁相不能尙也若夫言出於口龍驥所不能追行成於心王公所不能及悲懷徇物風雨晦而逾勤苦節橫秋冰霜急而逾固戶居環堵而歲計有餘道周稊稗而日用無竭又於學射靈山別立仙居一所卽至真之珠庭也栽松蒔柏與月樹而交輪刻桷雕甍共星樓而接翼蒼郊卻倚猶太行之北登錦肆前通似灞陵之南望華表千年之鶴未見咸都津亭八月之龍時歸鄉里法師出家入道三十餘年弟子所得觀施不可稱量盡入修營咸供衆用見諸疾苦便開五色之囊遇彼饑寒輒有千金之費巾拂之外餘無所留凡所經過洪濟多矣法師又於咸亨二年正月十八日寢疾之際聞空中有聲曰天上今欲相煩爲玉京觀主法師辭以至真功德未就因請不行少選之間所疾便愈左右侍者無不同聞自是遠近道俗咸共驚嗟曰天上知余不肖將棄余矣上座監齋某等並迴流左映策地景於丹田浩氣中升養天倪於紫室雖復同班玉籍並列仙宮每屈宗師之道仍修弟子之敬亦猶被衣齧缺同德而相尊雲將鴻濛比肩而相下大弟子並仙庭十哲道家童師閉門鍊火陪嘯父之高烟卜肆驅筭記壺公之遠御咸用輯瓊臺之墜典正攀樹之頽風散在人間敷揚道教可謂庚桑畏壘致大壤以匡時范鵠夷行計然而濟俗僉曰吾

師也。一作萬物而不以為義，利萬代而不以為仁，逍遙乎有無之表，彷徨乎塵垢之外，東郭順子無擇

存而不論，伯昏瞀人禦寇論而不議，豈使為山九仞，道不列於珠庭，築館三休，功未書於瑤版，下官迷方

看博，邀赤斧於禺山，失路乘槎，問君平於蜀郡，汾陽處子目擊而言忘，漢陰丈人德全而機謝，是用搜奇

井絡，題片石於靈邱，觀藝協晨，見乘雲之飛將，蒼蒼中野，同銷地媪之魂，眇眇太初，獨昧天師之化，其詞

曰：

象帝之先，其誰之子，徒觀其妙，莫究其始，果而勿伐，為而不恃，強為之名，謂之道紀。其一太樸云季，孝慈

已彰，邈邈帝祖，纒繩帝鄉，曰神曰聖，為龍為光，千年受籙，萬古稱王。其二於鑠帝唐，不承天秩，道風吹萬

元猷，配一五載，乘雲三山，禮日薦璧，延士投金，訪術。其三地分輿井，城連劍闕，錦瀨開霞，帽峯吐月，白雲

舒卷，青山迴沒，菌閣香飛，桃花源發。其四紫宸高映，丹宮洞開，巖舒金碧，地起樓臺，鶴飛龍度，鸞歌鳳迴

星雨交接，風烟去來。其五寶龜涵影，玉顏乃睇，神劍九光，華冠萬變，日軒朝徹，雲歌夕轉，紫樹瓊鐘，元壇

竹院。其六偉歎上士，昭哉至人，笙簧道德，粉澤人倫，汾陽處子，箕山外臣，遂荒白屋，奄有元津。其七玉局

將墜，金階無主，草滋紅壁，苔凝繡柱，式佇賢才，崇其轡矩，福庭霞煥，仙徒霧聚。其八縹緲四真，雍容十哲

俱升，紫宇並邀清節，松子排煙，焦君臥雪，辨雲懸寓，神遊朗徹。其九玉壘庭紳，珠鄉勝踐，鐘鼎紛譏，江山

悠緜，薛縣池平，萊州水淺，懸日月於鼇極，播天人於鳳掾。其十

056/18

民國 22 年 7 月  
FIL 國中圖

91.12

31120003399747  
S 030.85 1424 v.18  
盧, 照鄰  
盧昇之集

DTL 國中圖

39.5  
8656

150.1  
7301

中華民國三十年十二月初版

(926839)

合本國學基  
叢書 盧昇之集 一冊

每冊實價國幣叁角  
外埠酌加運費

著者 盧 王 商  
發行人 王 商  
印刷所 商  
發行所 商



Reading & Learning  
閱讀知識 · 學習成長

十 三 〇 八

審

0561

269

18

